



Иоаннай бэшэһэн гэршэлгэ

Энэ ном соо юун тухай хэлэгдэнэб

1 ¹Наяар юун болохоёо байнаб гэжэ бүгэдыень зарасанартаа харуулхын тула Иисус Христосой гэршэлгыг Бурхан тэрээндэ даалгаа һэн. Христос Өөрынгөө зараса Иоаннда Бурханай Эльгээмэлыг ябуулжа, энээн тухай соносхоһон юм. ²Иоанн харанан үзэһэнөө бултыень үнэн зүб гэжэ баталба. Энэнь Бурханай үгэ, Иисус Христосой гэршэлгэ мүн. ³Энэ ном дотор бэшээтэй Бурханай хэлэһэн үгэнүүдыг уншадаг, шагнадаг ба сахидаг хүнүүд жаргалтай юм, юуб гэхэдэ, саг ойртошоод байна.

Һүзэглэгшэдэй бүлгэмүүдыг мэндэшлэгэ

⁴Аси можын хүзэглэгшэдэй долоон бүлгэмүүдтэ би Иоанн ханданаб. Бурхан бии юм, байһаншье, байхашье юм. Бурханһаа, тэрэней хаан шэрээгэй урдахи долоон Һүлдэнүүдһээ, ⁵мүн үнэн бодото Гэршэ байһан, үхөөд, анха түрүүн амидырһан, газар дэлхэйн хаашуулай Эзэн бологшо Иисус Христосхоо таанадта амгалан байдал, буян хайра үршөөгдэнэ. Иисус Христос манда дуратай, тиймэһээ өөрынгөө шуһа адхажа, бидэниие нүгэлһөөмнай сүлөөлөө. ⁶Иисус Христос бидэниие хаан түрэ дотор нэгэдүүлээд, Эсэгэ Бурхандаа алба хэдэг санаартаниинь болгоо. Иисус Христосто хэтэ мүнхын алдар соло, эршэ хүсэн байхань болтогой! ⁷Хаража байгты: үүлэн соогуур тэрэ ерэхэ. Бүхы хүнүүд, мүн жадаар хадхаашадшье тэрэниие хараха. Газар дэлхэйн бүхы арадууд тэрэниие шаналан хайрлаха. Үнэхөөрөө тийхэ юм. Болтогой! ⁸«Би хадаа Альфа, Омега* гээшэб! – гэжэ Эзэн Бурхан хэлэнэ». Тэрэ ходоодо байгаа, байнашье, байхашье, Хамагыг зонхилогшо гээшэ.

* Альфа Омега гээшэ грек алфавидай түрүүшын ба һүүлшын үзэгүүд мүн.

Амидырган Иисусыг Иоанн хараба

⁹ Би Иисусай шаби, Иоанн ахатнай гээшэб. Бурханай хаан түрын эрхэтэн мүн туладаа би таанартал адляар зобожо тулижа, тэсэжэ байнаб. Бурханай үгэ номнононойнгоо, Иисусыг гэршэлхэнэйнгээ түлөө би Патмос гэжэ олтирогто сүлэгдөө нэм. ¹⁰ Дээдын Эзэнэй үдэр би Нангин Хүлдын нүлөөдэ абтабаб – ара тээмни бүдүүн дуутай бүрээ шэнги юумэнэй хүнхинэтэр дуугархыг дуулабаб. ¹¹ Тэрэ абьян намда иигэжэ хэлэбэ: хаража байһан юумээ ном соо бэшээд, Эфесэй, Смирнын, Пергамай, Тиатирай, Сардисай, Филадельфин, Лаодикийн хүзэглэгшэдэй бүлгэмүүдтэ эльгээлши. ¹² Намтай хэн хөөрэлдэнэб гэжэ һонирхон гэдэргээ эрьехэдээ, алтан долоон дэнгүүдыг харабаб. ¹³ Долоон дэнгүүдэй дундань хүнтэй адлирхуу амитанай зогсохыг харааб. Тэрэ болбол уужам ута хубсаһатай, сээжээрээ боохон алтан бэхэтэй нэн. ¹⁴ Тэрэнэй үһэниинь сагаанаар будаһан ноондди, саһан шэнги саб сагаан, нюдэниинь дүлэтэн носожо байһан гал шэнги байгаа бэлэй. ¹⁵ Хүлнүүдын шатама халуун пээшэндэ халаажа улайлаһан зэд шэнги, хоолой гээшэнь хүүюур уһан мэтэ хүнхинэжэ байгаа нэн. ¹⁶ Тэрэ хүн баруун гартаа долоон одонуудыг баряад байгаа, тиин хоёр тээшээ хурса эритэй элдэ аманһаань бултайжа байгаа, шарайнь шатама шанга гэрэлтэй наран шэнги байһан юм. ¹⁷ Тэрэниие харамсаараа, би үхэһэн шэнгээр хүлэинь хажууда унашабаб. Тиихэдэмни тэрэ хүн баруун гараа мүрэ дээрэмни табяад, намда иигэжэ хэлэбэ: бү ай; би хадаа Түрүүшынхинь, Һүүлшынхинь гээшэб, ¹⁸ би амидыб; үхөөд байһанаа мүнөө хэтэ мүнхэдөө амиды ябахаб; үхэлэй ба үхэлэй ороной түлхюурнүүдын намда бии юм. ¹⁹ Ши юу хараабши, мүнөө ямар юумэн боложо байнаб, хожом юун болохоб – энээн тухай ши бэшээрэй. ²⁰ Минии гартаа баряад байхыг шинии хараһан долоон одонуудай, алтан долоон дэнгүүдэй нюусань иимэ: долоон одонууд хүзэглэгшэдэй долоон бүлгэмүүдэй Бурханай Эльгээмэлнүүд мүн, шинии хараһан долоон дэнгүүд хүзэглэгшэдэй долоон бүлгэмүүд мүн гээшэ.

Эфесэй хүзэглэгшэдэй бүлгэмдэ хандалга

2 ¹ Эфесэй хүзэглэгшэдэй бүлгэмэй түлөөлэгшэдэ иигэжэ бэшээрэй: «Баруун гартаа долоон одонуудыг баряад, алтан долоон дэнгүүдэй дундуур ябагша иигэжэ хэлэнэ: ² танай бүтээһэн үйлэ хэрэгыг, танай хэһэн ажалыг, танай тэсэбэриег би мэдэнэб. Хара

hanaa танда таанад тон дурагүйт гэжэ мэдэнэб, Иисусай элшэд бэшэ аад, элшэнэрын гээшэбди гээд өөхэдэгөө тоологшодые шалгажа үзөөд, тэдэнэр хадаа худалшад мэхэшэд мүн гэжэ таанадай элирүүлһыетнай би мэдэнэб; ³ таанад ехэ бэрхэшээлнүүдые гатааат, тэсэбэритэй байнат, минии нэрэ хүндын түлөө эсэшэ сусашаггүйгөөр ажаллаат гэжэ мэдэнэб. ⁴ Теэд анха түрүүшынхидээл адляар намда дурагүй болоһондотнай таанадые зэмэлнэб. ⁵ Хаанаһаа бууһанаа ханажа, нүгэл хэхээ болиит, анханайнгаа хэрэгүүдые бүтээгйт. Нүгэл хэхээ болёогүй хаатнай таанадта ерээд, танай дэнгы абаад ябашааб. ⁶ Зүгөөр, николаидуудай үйлэ хэрэгүүдтэ дураа гутан эбүүрхэдэгтнай хайн гээшэ. Бишье тэдэндэ дураа гутагшаб. ⁷ Хүзэглэгшэдэй бүлгэмүүдтэ Нангин Хүлдын хэлэһэниие шэхэтэй юм хаа, шагнаг лэ! Бурханай сэсэрлигтэ ургадаг мүнхэ амидаралай модоной жэмэсые амталха эрхэ илаашада үгэхэб».

Смирнын хүзэглэгшэдэй бүлгэмдэ хандалга

⁸ Смирнын хүзэглэгшэдэй бүлгэмэй түлөөлэгшэдэ иигэжэ бэшээрэй: «Үхөөд байһанаа амидырһаниинь, Түрүүшынхи, Хүүлшынхинь гээшэб: ⁹ танай зоболон гашуудалые, үгытэй ядуу байһыетнай мэдэнэб, – үнэндөө хадаа таанад баянта! Мүн еврейнүүд бэшэ аад, еврейнүүдбди гэгшэдэй таанадые хардаашадые би мэдэнэб, юундэб гэбэл, тэдэнэр Сатанагай мэдэл доро сугларһан улад гээшэ. ¹⁰ Зобохо тулихаяа байнабди гэжэ бү айгаарайт. Таанарые туршажа үзэхээ заримыетнай Шолмос түрмэдэ хааха, арбаад хоног соо тамалуулхат. Теэд үхэн үхэтэрөө үнэн сэхэ байгаарайт, би танда мүнхын амидалал үршөөхэб! ¹¹ Хүзэглэгшэдэй бүлгэмүүдтэ Нангин Хүлдын хэлэһэниие шэхэтэй юм хаа, шагнаг лэ! Илаашые хоёрдохийо хүнөөхэгүй».

Пергамай хүзэглэгшэдэй бүлгэмдэ хандалга

¹² Пергамай хүзэглэгшэдэй бүлгэмэй түлөөлэгшэдэ бэшээрэй: «Хоёр тээһээ хурса эритэй хэлмэтэ иигэжэ хэлэнэ: ¹³ таанад сатанагай хаан шэрээгэй газарта байдагта гэжэ би мэдэнэб. Зүгөөр таанад намда үнэн сэхээр хандадагта, сатанагай байдаг газартатнай минии үнэн сэхэ гэршэ Антипын алуулһан үдэрнүүдтэшье намһаа таанад арсаагүйт. ¹⁴ Теэд таанадые зэмэлхэ зарим юумэн намда бии: Валаамай хургаалые баримталагша хүнүүд таанарай дунда байдаг. Валаам хадаа Израилиин зониие нүгэл шэбэлдэ оруулха, хуурмаг бурхануудта үргэһэн эдеэнһээ амсуулха, зальхай хамуу ябадалтай болгохо тухай

Валак хаание хургаа хэн. ¹⁵ Мүн бага николаидуудай хургаалые баримталагшадшые таанадай дунда бии. ¹⁶ Нүгэл хэхэеэ болигты! Тиигээгүй хаатнай, удангүй таанадта ерээд, аманһаамни гарагша эритэ хэлмээр николаидуудай хургаал баримталагшадтай тэмсэхэб. ¹⁷ Һүзэглэгшэдэй бүлгэмүүдтэ Нангин Һүлдын хэлэхэниие шэхэтэй юм хаа, шагнаг лэ! Илагшада би далда хадагалаатай манна эдеэ үгэхэб, сагаан шулуу үгэхэб. Шулуун дээрэнь шэнэ нэрэ бэшээтэй байха, тиин шулуу абагшаһаа ондоо хэншые тэрэ нэрые мэдэхэгүй юм».

Тиатирай хүзэглэгшэдэй бүлгэмдэ хандалга

¹⁸ Тиатирай хүзэглэгшэдэй бүлгэмэй түлөөлэгшэдэ бэшээрэй: «Носожо байһан гал дүлэн шэнги ялалзама нюдэтэй, халуун пеэшэн соо халаажа улайлганан зэд шэнги хүлнүүдтэй Бурханай Хүбүүн иигэжэ хэлэнэ: ¹⁹ танай бүтээһэн хэрэгые, танай дуратай байһые, алба хэһые, этигэл найдабариие, тэсэбэри зоригые мэдэнэб, мүнөө бүтээгшэ үйлэ хэрэгтнай урдынхиһаа бүри ехэ юм гэжэ мэдэнэб. ²⁰ Теэд таанадые зэмлэхэ зарим юмэн намда бии: өөрыгөө лүндэншэ гээд тоолодог Иезавель һамгые таанад зүбшөөнэт; тэрэ һамган өөрынгөө хургаал заабариие номножо, минии зарасанарай тархи толгой эрьюулнэ, тэдэниием зальхай һамуу ябадалтай болгоно, худал бурхануудта үргэһэн хоол эдюулжэ хургана. ²¹ Нүгэл шэбэл үйлэдэхэеэ болихынь тула тэрэ эхэнэртэ саг гаргажа үгөөб, теэд нүгэл шэбэлээ тэрэ орхихо дурагүй байна. ²² Тиимэхээ би тэрэ һамганда үбшэн зоболон асаруулхаб, хэрбээ нүгэл үйлэдэхэеэ болёогүй һаань, тэрэ эмэтэй гүйлдэгшэдые туйлай ехэ уйдхар гашуудалда оруулхаб. ²³ Тэрэ гэргэнэй үхибүүдые үхүүлхэб. Тиихэдэмни хүнэй зүрхэ сэдхэлые, һанал бодолые сүм мэдэдэг юм байна, тиин хүн бүхэндэ хэһэн үйлэ хэрэгэйнэ зэргээр хүртөөхэ юм байна гэжэ намайе хүзэглэгшэдэй бүхы бүлгэмүүд ойлгохо. ²⁴ Тиатирда байгша бусад бүхы таанадта, энэ хургаал заабариие баримталдаггүй ба сатанагай гүн нюуса гэдэгыень мэдэдэггүйшүүлдэ иигэжэ хэлэнэб: үшөө ондоо бэрхэшээлнүүдые таанадта эльгээхэгүйб. ²⁵ Теэд мүнөө таанадта бии байһан юмееэ минии ерэтэр баряад байгты. ²⁶⁻²⁸ Минии бүхы зарлигые эсэстэнь хүрэтэр бээлүүлдэг илагшын эрхэ мэдэлдэнь арадуудые үгэхэб. Бишые баһал тиигэжэ өөрынгөө Эсэгэһээ засаг түрые абаа һэм. Илагша тэрэ хүн тэдэ арадуудые түмэр таягаараа захиргаалан зонхилжо байха; тэдэ зон шабар амһартануудтал адляар хяа бута сохюулха. Тэрэ илагшада үглөөнэй одые үгэхэб. ²⁹ Һүзэглэгшэдэй бүлгэмүүдтэ Нангин Һүлдын хэлээшые шэхэтэй юм хаа, шагнаг лэ!»

Сардисай хүзэглэгшэдэй бүлгэмдэ хандалга

3 ¹Сардисай хүзэглэгшэдэй бүлгэмэй түлөөлэгшэдэ иигэжэ бэшээрэй: «Бурханай Нангин долоон Һүлдын, мүн долоон одонуудай Эзэн иигэжэ хэлэнэ: танай бүтээһэн үйлэ хэрэгы мэдэнэб; таанад амиды гэжэ тоологдонот, үнэхөөрөө таанад үхөөд байнат. ²Һэргэлэн байгты; үлөөшэ юумээ хуу барандаа хосороодүйдэнэ бэхижүүлэгты, юуб гэбэл, үйлэ хэрэгүүдтнай Бурханаймни урда хүсэд дүүргэгдээгүй гэжэ би һананаб. ³Таанад юу абаа, юу дуулаа һэмта, тэрэнэ сахин хадагалжа байгты, нүгэл хэхээ болигты! Хэрбээ һэргэлэн байгаагүй һаатнай, би таанадта хулгайшан шэнгээр гэнтэ ерэхэб, хэдыдэ ерэһыемни таанад мэдэхэгүйт. ⁴Тээд өөһэдүнгөө хубсаһа бузарлаагүй хэдэн хүнүүд Сардистатнай бии байна, тэдэтнай сагаан хубсаһа үмдөөд, намтай хамта ябалсаха, юундэб гэбэл, этигэл найдабарида тэдэ хүрэнэ. ⁵Илагша баһал сагаан хубсаһа үмдэхэ; тэрэнэй нэрые амидаралай номһоо би хэзээшье зуража хаяхагүйб, тэрэ хүн минии юм гэжэ өөрынгөө Эсэгы урда, Бурханай Эльгээмэлнүүдэй урда мэдэрхэб. ⁶Һүзэглэгшэдэй бүлгэмүүдтэ Нангин Һүлдын хэлэһэниие шэхэтэй юм һаа, шагнаг лэ!»

Филадельфиин хүзэглэгшэдэй бүлгэмдэ хандалга

⁷Филадельфиин хүзэглэгшэдэй бүлгэмэй түлөөлэгшэдэ бэшээрэй: «Нээгээ һаа, хэнэйшье хаажа шадахагүй, хаагаа һаа, хэнэйшье нээжэ шадахагүй Давидай оньһон түлхюүртэй Нангин Үнэн сэдхэлтэн иигэжэ хэлэнэ: ⁸танай бүтээһэн үйлэ хэрэгы мэдэнэб, – тиин би урда тээхи үүдыетнай нээбэб, тэрэниие хэншье хаажа шадахагүй, юундэб гэхэдэ, таанад хүсэ багатайшье һаа, минии һургаал сахинат, минии һургаалһаа арсаагүйт. ⁹Хаража байгаарайт! Өөһэдүгөө еврейнүүд гэжэ тоолодог аад, сатанагай мэдэлдэ байһан улады танда асараад, хүлдэтнай унан дохихыень баадхахаб. Үнэхөөрөө тэдэнэр еврейнүүд бэшэ юм, худалаар хэлэнэ. Мүн танда дуратай байһыемни тэдэ улад мэдэхэ. ¹⁰Тэсэбэритэй байха тухай минии зарлиг заабариие сахихан туладатнай, газар дэлхэйнхиды туршажа үзэхээ бүхы юртэмсэдэ тохёолдохоёо байгаа гай аюулай үедэ би таанады хамгаалан үлөөхэб. ¹¹Иигээд удангүй ерэхэб. Илалтынтай аша үрые хэнэйшье абажа ябашахагүйн тула бии байһан юумээ шангаар баряад байгаарайт. ¹²Илагшые би өөрынгөө Бурханай Һүмэ доторхи бахана тулгань болгохоб, тиин тэрэ илагша хэтэ заяандаа

тэндэ үлэхэ. Өөрынгөө Бурханай нэрые, минии Бурханай үршөөлөөр тэнгэриһээ бууха өөрынгөө Бурханай хотын, шэнэ Иерусалимай нэрые, мүн өөрынгөө шэнэ нэрые тэрэ Һумын бахана дээрэ бэшэхэб. ¹³ Һүзэглэгшэдэй бүлгэмүүдтэ Нангин Һүлдын хэлэһэниие шэхэтэй юм хаа, шагнаг лэ».

Лаодикиин Һүзэглэгшэдэй бүлгэмүүдтэ хандалга

¹⁴ Лаодикиин Һүзэглэгшэдэй бүлгэмэй түлөөлэгшэдэ иигэжэ бэшээрэй: «Болтогой гэжэ нэрэтэй үнэн бодото найдабаритай Гэршэ, Бурханай бүтээлэй Эхиниинь иигэжэ хэлэнэ: ¹⁵ танай бүтээһэн үйлэ хэрэгые мэдэнэб. Таанад хүйтэншые бэшэт, халууншые бэшэт. Ай даа, таанадай нэгэн гэбэл хүйтэн, али үгы хаа халуун байгаа хаатнай ямар хайн бэлэй даа! ¹⁶ Теэд таанад хүйтэншые бэшэ, халууншые бэшэ, харин юрэл миин дулаан байнат. Би таанадые аман сооһоо нёлбоһоо гаргаһандал адляар, өөрһөө холуур намнахамни. ¹⁷ Юундэб гэхэдэ, таанад: «Би баяжааб, ехэ зөөритэй болооб, юугээршые дутанагүйб!» – гэнэт. Теэд таанад ямаршые зол хубигүй, үгытэй ядуу, баарһан, хохор балай, нюсэгэн болоод байһанаа мэдэнэгүйт! ¹⁸ Баян болохын тула галаар арюудхагдаһан алта намһаа худалдажа абахыетнай зүблэнэб, шарбай нюсэгэн бээ харуулжа ябахыгын тула сагаан хубсаһа намһаа абажа үмдэгты, юумэ харадаг болохын тула нюдэнэй эм абажа, нюдэндөө түрхигты. ¹⁹ Дуратай хүнүүдэе би элишэлэн шүүмжэлдэг, хэһээдэгби. Тиимэһээ таанад хэшээл оролдолго гаргагты, нүгэл хэхээе болигты. ²⁰ Энэ би үүдэнэй хажууда ерээд, үүдэ тоншожо байнаб. Минии абяа дуулаад, үүдэ нээһэн хүнэйдэ би орожо, хамта эдеэлхэб, тэрэ хүн намтай суг эдеэлхэ. ²¹ Би илажа гараад, өөрынгөө Эсэгэтэй хамта хаан шэрээдэнь һуугаа һэм, тэрээндэл адляар, намтай хамта минии хаан шэрээдэ һууха эрхые би илагшада олгохоб. ²² Һүзэглэгшэдэй бүлгэмүүдтэ Нангин Һүлдын иигэжэ хэлэһэниие шэхэтэй юм хаа, шагнаг лэ!»

Тэнгэри дээрэхи Бурханда Һүгэдэлгэ

4 ¹ Тэрэнэй удаа би тэнгэри өөдэ шэртэхэдээ, тэнгэрийн үүдэнэй онгорхой байхые обёорбоб. Тиин бүрээгэй дуугарһандал адли абяа дуулабаб. Түрүүн хандаһан абяан намда иигэжэ хэлэбэ:

– Өөдөө гара. Тиигээд юунэй болохые шамда хөөрэхэб.

² Удангүй би Нангин Һүлдын нүлөөдэ абтажа, өөдөө дэгдэшэбэб. Тиин тэнгэридэ хаан шэрээ урдани байба, дээрэнь хэншыеб һуужа

һууба. ³ Хаан шэрээ дээрэ тэрэ Һуугаашань үнэтэ хас шулуун, мана шулуун шэнгээр толоржо байба. Хаан шэрээнь тойроод, номин шулуун мэтээр холонго ялалзан татажа байба. ⁴ Энэ хаан шэрээе тойроод, баһа хорин дүрбэн хаан шэрээнүүд байгаа. Тэдэ хаан шэрээнүүд дээрэ хорин дүрбэн ахаматууд һуугаа. Эдэ ахаматууд сагаан сагаан хубсаһа үмдэнхэй, толгойдонь алтан алтан титим малгайнууд табяатай. ⁵ Хаан шэрээһэнь сахилгаан сахилжа, тэнгэрийн дуун нэрбежэ, шанга шууяан гаража байба. Хаан шэрээгэй урда долоон зула носоно. Эдэнь Бурханай долоон Нангин Һүлдэ мүн бэлэй. ⁶ Баһа хаан шэрээгэй урда болор мэтэ сэбэр тунгалаг шэл далай шэнги юумэн байба.

Хаан шэрээгэй дүрбэн буланда дүрбэн амитад байба. Тэдэ амитад урдаһаашье, хойноһоошье тон олон нюдэтэй һэн. ⁷ Түрүүшынь амитан арсалантай адлишуу, хоёрдохинь залуу буха шэнги, гурбадахинь нюураараа хүн мэтэ, харин дүрбэдэхинь ниидэжэ байһан бүргэд шэнги бэлэй. ⁸ Эдэ дүрбэн амитад тус бүридөө зургаа зургаан далитай һэн. Далинуудайнь дээгүүршье, доогууршье олон нюдэнүүд байгаа. Тэдэ дүрбэн амитад эсэн сусангүй, үдэр һүнигүй иигэжэ ходо дабтагша һэн:

– Хамагыё зонхилогшо арюун нангин, арюун нангин, арюун нангин Эзэн Бурхан түрүүншье байгаа, мүнөөшье байна, саашадаашье байхал!

⁹ Хаан шэрээ дээрэ Һуугаашада – хэтэ мүнхэдөө Амидарагшада алдар соло, нэрэ түрэ, баяр баясхалангаа тэдэ амитадай хүргэхэдэнь, ¹⁰ хорин дүрбэн ахаматууд хаан шэрээ дээрэ Һуугаашын урда тээ газарта нюураараа сохин унаха, хэтэ мүнхэ Амидарагшын урда доро дохин мүргэхэ, тиин хаан шэрээгэйн урда титим малгайнуудаа табяад, иигэжэ хэлэхэ:

¹¹ – Манай Эзэн Бурхан, ши али бүхы алдар солодо, нэрэ хүндэдэ, засаг түрэдэ хүртэмөөр байнаш, яахадааб гэбэл, бүхы юумэн шамаар бүтээгдээ, шинии хүсэл зоригоор байгуулагдаа.

Ном бэшэг, Үргэлэй Хурьган тухай

5 ¹ Тиигээд долоон тамгаар тамгалан хаагаатай, дотор, гадаргүй бэшээтэй номыё хаан шэрээдэ Һуугаашын баруун гартань би харабаб. ² Бурханай түгэлдэр хүсэтэ эльгээмэлыё харабаб.

– Хэн тамгыень эбдэжэ, энэ ном нээжэ шадахаб? – гэжэ Бурханай тэрэ эльгээмэл шангаар дуугарба. ³ Теэд тэнгэридэшье, газар

дээрэшье, газар доросье энэ номые нээжэ, хаража шадаха хэншье байбагүй. ⁴ Энэ номые зүйтэйгөөр нээгээд, уншажа шадаха, угайд-хадаа үзэжэ хаража шадаха нэгэшье хүнэй олдоогүйдэнь би ехээр гашуудан уйлаа бэлэйб.

⁵ – Бү уйла! Харалши! Илаашань Иудын угай, Давидай үри нада-хан болохо Арсалан тээ тэрэ байна. Долоон тамгыень эбдэжэ, энэ номые тэрэл нээжэ шадаха, – гэжэ нэгэ ахаманынь намда хэлэбэ.

⁶ Харан гэхэдэмни хаан шэрээгэй урда дүрбэн амитадай, мүн ахамадудай урда тахил болгогдон табигдаһан янзатай Үргэлэй Хурьган зогсожо байба. Тэрэ Хурьган долоон эбэртэй, долоон нюдэтэй һэн. Эдэнь бүхы газар дэлхэйдэ Бурханай эльгээһэн Нангин долоон хүлдэнь байгаа. ⁷ Үргэлэй Хурьган хаан шэрээдэ дүтэлэн ерэжэ, тэндэ Ёуугаашын баруун гарһаань ном абаба. ⁸ Номые тэрэнэй абахадань, дүрбэн амитад, хорин дүрбэн ахамадуд Үргэлэй Хурьганай урда хүгэдэн, доро дохибо. Тэдэнэр тус бүридөө нэгэ нэгэ ятагануудые, хүжэ санзай дүүрэтэр хэһэн алтан аягануудые гартаа баряад байгаа. Эдэ бүгэдэнь Бурханай зоной бүтээдэг мүргэл зальбаралынь мүн бэлэй. ⁹ Тиин тэдэнэр иимэ шэнэ дуу дуулаба: ши энэ ном абажа, тамгыень эбдэжэ тайлаха эрхэтэйш, ши үргэл болгогдожо алуулаад, өөрынгөө улаан шуһанай сэнгээр али бүхы угсаатаниие, элдэб янзын хэлэтэй зониие, бүхы уг изагууртаниие, үндэһэ яһатаниие Бурханда абажа үгөөш. ¹⁰ Ши манай Бурханай аша туһада тэдэ хүнүүдые санаартад, хаашуул болгоош – тэдэнэр газар дэлхэйн зониие зонхилжо байха! ¹¹ Хаан шэрээе, амитадые, ахамадудые тойроод, Бурханай олон эльгээмэлнүүдэй дуугаржа байхые би харааб, шагнааб. Тэдэнэр үй түмэн, тоо томшогүй олон байгаа бэлэй. ¹² Тэдэ шанга шангаар иигэжэ хашхаралдан байгаа һэн: Тахил болгогдожо табигдаһан Үргэлэй Хурьган засаг түрэ, зөөри баялиг, сэсэн бодол, хүсэ шадал, нэрэ түрэ, алдар соло, магтаал юрөөлдэ хүртэхэ эрхэтэй. ¹³ Тэнгэри, газар дээрэ, газар доро, далайда байһан бүхы амитадай иигэжэ хэлсэхые би дуулааб:

– Хаан шэрээ дээрэ Ёуугаашада, мүн Үргэлэй Хурьганда хэтэ мүнхын магтаал юрөөл, нэрэ хүндэ, алдар соло, хуули засаг олгогдохонь болтогой!

¹⁴ Дүрбэн амитадынь:

– Болтогой! гэбэд. Ахамадудынь газарта дохин унажа, хүгэдэн мүргэбэ.

Түрүүшын зургаан тамга тайлбарилба

6 ¹ Долоон тамгын түрүүшынхиень Үргэлэй Хурьганай эбдэхые би харааб, тиигээд: «Наашаа ерэ!» – гэжэ түрүүшын амитанайнь тэнгэри дуугарһандал адляар хүнхинэмэ шангаар хэлэхые би дуулааб. ² Би сагаан мори харабаб. Гартаа ном барихан хүн тэрэ мори унаад ябаба. Толгойдоо үмдэхэ титим малгай абаһан тэрэ хүн илагша мэтээр гаража, илалта туйлахаяа ябаба. ³ Хоёрдохи тамгыень Үргэлэй Хурьганай тайлахада: «Наашаа ерэ!» – гэжэ хоёрдохи амитанайнь хэлэхые би дуулааб. ⁴ Тиихэдэнь ондоо, гал улаан зээрдэ морин гараба. Мори унаһан тэрэ хүндэ газар дайда дээрэхи амгалан тайбан байдалые эбдэжэ, дэлхэйн зоной бэе бээ аласалгын эрхэ засаг олгогдоһон байгаа. Тиин тэрээндэ томо гэгшын хэлмэ үгтөө бэлэй. ⁵ Гурбадахи тамгыень Үргэлэй Хурьганай тайлахада: «Наашаа ерэ!» – гэжэ гурбадахи амитанайнь хэлэхые би дуулааб. Харан гэхэдэмни, хара мори унаһан хүн гартаа шэгнүүр баринхай байба. ⁶ Тиигээд дүрбэн амитанай зүгһөө иимэ абяанай гарахые дуулааб: «Нэгэ килограмм шэниисын түлөө бүхэли үдэр ажаллаха, гурбан килограмм ешмээнэй түлөө бүхэли үдэр ажаллаха! Теэд оливай модо үзэмэй модо хоёрые бү гутаа!» ⁷ Дүрбэдэхи тамгыень Үргэлэй Хурьганай тайлахада: «Наашаа ерэ!» – гэжэ дүрбэдэхи амитанайнь хэлэхые би дуулааб. ⁸ Харан гэхэдэмни, сунхигар сагаабтар морин байба. Дээрэнь Үхэл һууба, тэрэниие дахаад, Үхэлэй орон ябаба. Газар дэлхэйдэ һуугаашадай дүрбэнэй нэгэ хубиие хэлмэ жадаар, үлэсхэлэн хоһон байдалаар, үбшэн тахалаар, ан арьяатанаар алуулха хюдуулха эрхэ засаг Үхэлдэ, Үхэлэй орондо олгогдоһон байна. ⁹ Табадахи тамгыень Үргэлэй Хурьганай тайлахадань, Бурханай Үгын түлөө, гэршэ болоһонойнгоо түлөө алуулагшадай хүнэһе хүлдэнүүдые тахилай шэрээ доро харабаб. ¹⁰ «Нангин гэгээн, хамагые зонхилогшо үнэн бодото Эзэн Бурхан аа! Газар дэлхэй дээрэ бидэниие алаашадые гэмнэнгүй, хэһээнгүй хэды болотор хүлээхэ гээ юмши!» – гэжэ тэдэ алуулагшад шанга шангаар хашхаралдаба. ¹¹ Тэдэнэй хүн бүхэндэнь сагаан хубсаһа үгтэбэ. Тэдэ алуулагшадта: «Христосто алба хэһэн тусгаар тооной аха дүүнэрэйтнай алуултар таанар үшөө нэгэ бага амаржа байгты. Тэдэтнай таанартал адляар алуулха», – гэжэ хэлэгдэбэ. ¹² Зургаадахи тамгыень Үргэлэй Хурьганай тайлахадань, харан гэхэдэмни, газар ехээр хүдэлбэ; наран гээшэ үхэхэн хүнүүдэй хойноһоо шаналан уйлаашадай хара хубсаһандал

адли баларташоод, нара гээшэ шуһан улаан болошоод байба. ¹³ Ар-гагүй шанга хуй һалхинай болоходо боди модоной эдешээдүй үрэ жэмэсүүдэй хийдэн унадагтал адляар, огторгойн одо мүшэд газарта унашаба. ¹⁴ Огторгой тэнгэри гээшэ орёһон саарһан мэтээр мон-согойршобо, бүхы хада ууланууд, арал олтирогууд өөһэдынгөө һуу-ринуудһаа хүдэлшэбэ. ¹⁵ Газар дэлхэйн хаашуулшые, дээгүүр тушаал-тай дарганаршые, сэрэгэй ноёдшые, баяшуулшые, засаг баригшад-шые, барлаг богоолнуудшые, юрын хүнүүдшые агы нүхэнүүдтэ, хада уулын хабшалда орожо хоргодобо. ¹⁶ Тэдэ хүнүүд хада, хабсагай-нуудта хандан, иигэжэ гуйба:

– Дээрэмнай унажа, хаан шэрээдэ һуугшаһаа, Үргэлэй Хурьга-най уур сухалһаа абарыт!

¹⁷ Юундэб гэбэл, эдэ хоёрой айхабтар ехэ уур сухалай үдэр хүр-эжэ ерэбэ, тиин тэрэ ехэ уур сухалыень хэн тэсэжэ шадахаб?

7 ¹ Тэрэнэй һүүлээр газар дэлхэйн дүрбэн буланда Бурханай дүр-бэн эльгээмэлнүүдэй зогсожо байхые харабаб. Тэдэ эльгээмэл-нүүд газар дайда руу, уһан далай руу, ой модо руу һалхилхагуйн ту-ла дэлхэйн дүрбэн һалхине халхалан барижа байгаа. ² Гартаа амиды Бурханай тамга баряад, зүүн зүгһөө ерэжэ ябаһан баһа нэгэ Бурха-най Эльгээмэлые харабаб. Тэрэ эльгээмэлын газар дайдада, уһан далайда гэм хоро хүргэхэ эрхэтэй дүрбэн эльгээмэлнүүдтэ хандан, иигэжэ шангаар хашхарба: ³ «Бурханай бүхы албатанай магнай духа-дань тамга даража тэмдэглээдүйдэмнай газар дайдадашые, уһан да-лайдашые, ой модондошые гэм хоро бү хэгты». ⁴ Хэды хүн духадаа тамга табюулааб гэжэ хэлсэхые дуулааб. Израилиин бүхы угсаата зоной зуун дүшэн дүрбэн мянган хүниинь тамга даруулһан байна: ⁵ Иудын угсаатанһаа арбан хоёр мянган хүн, Рувимай угсаатанһаа баһал арбан хоёр мянга, Гадай угсаатанһаа арбан хоёр мянга, ⁶ Аси-рай угсаатанһаа арбан хоёр мянган хүн, Неффалимай угсаатанһаа арбан хоёр мянга, Манассиин угсаатанһаа арбан хоёр мянга, ⁷ Си-меоной угсаатанһаа арбан хоёр мянга, Левиин угсаатанһаа арбан хоёр мянган хүн, Иссахарай угсаатанһаа арбан хоёр мянга, ⁸ Забуло-ной угсаатанһаа арбан хоёр мянга, Иосифой угсаатанһаа арбан хоёр мянга, Вениаминай угсаатанһаа арбан хоёр мянган хүн духадаа там-га даруулһан байна.

Тоолошогүй олон хүнүүд

⁹ Тэрэнэй удаа харахадамни, тооложо барагдашагүй олон зон урдамни үзэгдэбэ. Тэдэ зоной дунда бүхы үндэнэ яһатан, арадууд, угсаатан, янза бүрийн хэлэтэй хүнүүд ерээд байгаа нэн. Тэдэ зон хаан шэрээгэй урда, Үргэлэй Хурьганай урда зогсожо байгаа. Тэдэнэр сагаан хубсаһа үмдэнхэй, гартаа пальма модоной мүшэрнүүдые баринхай байһан юм. ¹⁰ Тэдэ иигэжэ хашхаралдан байгаа бэлэй: «Хаан шэрээдэ Һуугааша манай Бурхан, мүн Үргэлэй Хурьган абарха байна». ¹¹ Хаан шэрээе, ахаматуудые, дүрбэн амитадые тойроод, Бурханай бүхы эльгээмэлнүүд зогсожо байба. Тэдэнэр хаан шэрээгэй урда уруугаа хаража бултадаа унаад, Бурханда мүргэбэд. ¹² Тиихэ зуураа, тэдэ иигэжэ хэлээ: «Болтогой! Манай Бурханда магтаал соло, сэсэн бодол, баяр баясхалан, нэрэ хүндэ, эрхэ засаг, хүсэ шадал хэтын хэтэдэ үршөөгдөө! Болтогой!» ¹³ Тиигээд нэгэ ахаманын: «Сагаан хубсаһа үмдөөд байһан ямар хүнүүд гээшэб? Тэдэ хаанаһаа ерээб?» – гэжэ намһаа һураа. ¹⁴ «Ноён аа, ши мэдэнэш», – гэжэ харюусааб. Тиихэдэмни намда тэрэ иигэжэ хэлэбэ: «Эдэ хүнүүд гайтай ехэ гасалан зоболон үзэжэ ерэгшэд мүн. Эдэнэр хубсаһа хунараа Үргэлэй Хурьганай шуһанда угаажа, сагаан болгобо. ¹⁵ Тиимэхээ эдэ хүнүүд Бурханай хаан шэрээгэй урда зогсоод, тэрэнэй хүмэ дотор үдэр хүнигүй тэрээндэ алба хэнэ. Тиин хаан шэрээдэ Һуугааша эдэ хүнүүдые хамгаалха юм. ¹⁶ Тэдэ хүнүүд саашадаа үлэн хооһоор ябахагүй, ундаа хүрэжэ зобохогүй, аяма шанга наранда шаруулхагүй, бүгшэм халуунһаа боложо ядархагүй. ¹⁷ Юундэб гэхэдэ, хаан шэрээгэй урда зогсожо байгааша Үргэлэй Хурьган тэдэ хүнүүдэй адуулагша эзэниинь боложо, мүнхэдөө амидаралай уһанда тэдэниие залан абаашаха. Тиин эдэ хүнүүдэй нюдэнэй нулимсые Бурхан өөрөө аршаха».

Долоодохи тамгыень тайлаба

8 ¹ Долоодохи тамгыень Үргэлэй Хурьганай тайлахадань, хахад сагай туршада огторгой тэнгэридэ абяа шэмээгүй болошобо. ² Тиигээд Бурханай урда долоон эльгээмэлнүүдэйн зогсожо байхые харабаб. Тэдэ эльгээмэлнүүдтэ долоон бүрэнүүд үгтэнэн байба. ³ Удаань Бурханай баһа нэгэ эльгээмэл дүтэлэн ерээд, үргэлэй шэрээгэй хажууда зогсобо. Тэрэ эльгээмэл гартаа алтан бойпуур баряад байгаа. Бурханай бүхы хүнүүдэй мүргэлтэй нэгэдүүлхын тула,

хаан шэрээгэй урдахи тахилай алтан шэрээ дээрэ табяад утахынь тула обоо собоо хүжэ санзай Бурханай тэрэ эльгээмэлдэ үгтөө хэн. ⁴Хүжэ санзайн угааниинь Бурханай хүнүүдэй мүргэлтэй хамта Бурханай Эльгээмэлэй гартаа баряад байһан бойпуур сооһоо өөдөө дэгдээ бэлэй. ⁵Удаань тэрэ эльгээмэлынь бойпуур абажа, үргэлэй шэрээһээ залаһан галаар бойпуураа дүүргээд, газарта хаяжархиба. Тиихэдэнь газар дэлхэйдэ огторгойһоо дуун нэрьебэ, тэнгэри нижагана наса дуугарба, ехээр сахилгаан сахилба, газар хүдэлбэ.

Бүрэнүүдые дуугаргаба

⁶Долоон бүрэнүүдые баряад байһан Бурханай долоон эльгээмэлнүүд бүрээгээ дуугаргахаяа бэлдэбэд. ⁷Түрүүшын эльгээмэлэй бүрээгээ дуугаргахадань, шунатай холисолдоһон мүндэр оробо, гал дүлэн гараба, тиихэдэнь газар дэлхэйн гурбанай нэгэ хубинь, ой модоной гурбанай нэгэ хубинь, бүхы үбһэ ногоон шаташаба. ⁸Бурханай хоёрдохи эльгээмэлэй бүрээгээ дуугаргахадань, дүрэжэ байһан мантан томо хада шэнги юумэн далайда унашаба. Тиихэдэнь далайн гурбанай нэгэ хубинь шуһан болошобо. ⁹Далайда байһан амиды бүхы юумэнүүдэй гурбанай нэгэ хубинь үхэшэбэ, далайн бүхы онгосонуудай гурбанай нэгэ хубинь хосоршобо. ¹⁰Гурбадахи эльгээмэлэй бүрээгээ дуугаргахадань, дүлэн шэнгээр носожо байһан угаа томо одо мүшэн огторгойһоо ерэжэ гол мүрэнүүдэй, уһа горхонуудай гурбанай нэгэ хуби дээрэ унашаба. ¹¹Тэрэ одо мүшэн Тобшо Үрмэдэһэн гэжэ нэрэтэй хэн. Уһа мүрэнэй гурбанай нэгэ хубинь үрмэдэһэндэл адли гашуун боложо, иимэ уһа уугаад, хүн түрэлхитэнэй гурбанай нэгэ хубинь үхөө бэлэй. ¹²Дүрбэдэхи эльгээмэлэй бүрээгээ дуугаргахадань, наран, һара, одо мүшэд гэмтэжэ, гурбанай нэгэ хуби саг соо тэдэнэр гэрэл туяа үгэхээ болёод байба. Наран үдэрэй гурбанай нэгэ хуби саг соо гэрэл туяа үгэхээ болёод байба. Һара ба одо мүшэд һүниин гурбанай нэгэ хуби саг соо гэрэл туяа үгэхээ болёод байба. ¹³Зогсоод хаража байтарни, огторгойдо нэгэ бүргэд ниидэн, иигэжэ шангаар дуугаржа байба: «Газар дэлхэйдэ һуугшадта гайтай ехэ уйдхар гашуудал тохёолдохонь, юуб гэбэл, Бурханай бусад гурбан эльгээмэлнүүд бүрээгээ дуугаргахаяа байна».

9 ¹Табадахи эльгээмэлэй бүрээгээ дуугаргахадань, огторгой дээрэһээ одо мүшэнэй газарта унаад байхые обёорон харабаб. Газарай оёоргүй гүнзэгы нүхэ руу орохо түлхюур тэрэ одо мүшэндэ

үгтэһэн байгаа. ²Газарай тэрэ оёоргүй гүнзэги нүхэнэй үүдые одо мүшэнэй нээхэдэнь, тэндэһэнь аргагүй томо пеэшэн сооһоо гараһан шэнги бөөн хара утаан дэгдэн гараба. Тэрэ утаанһаань боложо, огторгой тэнгэри, нараншые бүрүүл харанхы болошобо. ³Хара утаан сооһоо таршаанууд бии боложо, газарта унаба. Тэрэ таршаануудта газар дэлхэйн хорото абаахайнуудтал адли ехэ эрхэ засаг үгтэһэн байгаа. ⁴Теэд үбһэ ногоондошые, ургамал, модонуудташые хоро хүргэхэгүйт, харин духадаа Бурханай тамгагүйл хүнүүдтэ хоро хүргэхэт гэжэ тэдэ таршаануудта хэлэгдэһэн байгаа. ⁵Мүн тиимэ хүнүүдые алахагүйт, харин таба һара соо миил үбэдхөөжэ зобоохот гэжэ тэдэ таршаануудта захигдаһан байна. Тэрэ үбшэниинь хүниие хорото абаахайн хадхаһандал адли ехэ үбшэнтэй байгаа. ⁶Тиихэ үедэнь хүнүүд зобоходоо үхэлөө бэдэрхэ, теэд үхэлынь олдохогүй, үхэхэ гэжэ ехэ оролдохо, теэд үхэлынь тэдэндэ ерэхгүй. ⁷Тэдэ таршаанууд хараха янзада дайралдахаяа байһан морид шэнги хэн. Таршаануудай толгойнуудтань алтан титим малгайнуудтал адлишуу юумэн үмдөөтэй, тэдэнэй нюур шарайнуудынь хүнэйхидэл адлинууд хэн. ⁸Таршаануудай толгойнуудай үһэниинь эхэнэр хүнэй үһэндэл адли, шүдэнүүд гээшэнь арсаланай ноёонуудтал адлирхуу бэлэй. ⁹Тэдэ таршаанууд дээгүүрээ түмэр шэнги хуягтай хэн, тэдэнэй ниидэхэдэ далинуудайнь хииганаан гээшэ олон тоото мори тэргээр дайн байлдаанда наяргалдан түргэлдэн орожо байһандал үзэгдөө бэлэй. ¹⁰Тэдэ таршаануудай хүлнүүдынь хорото абаахайнуудайхидал адли хэн, таршаануудай хүлнүүдтэнь хадхуурнууд бии хэн; таршаанууд тэдэ хадхуурнуудаараа таба һарын туршада хүнүүдые хадхажа зобоохо эрхэ засагтай байгаа. ¹¹Тэдэ таршаануудай хааниинь оёоргүй гүнзэги нүхэнэй эльгээмэл байһан юм; тэрэ эльгээмэлынь еврей хэлээр Аваддон, грек хэлээр Аполлион (оршуулбал: «Эбдэгшэ») бэлэй.

¹²Нэгэ аюул зоболонгой үнгэрхэдэ, хойноһоонь баһа хоёр ехэ гашуудал зоболон ерэхэ ёһотой байгаа.

¹³Зургаадахи эльгээмэлэй бүрээгээ дуугаргахадань, Бурханай урдахи тахилай алтан шэрээгэй дүрбэн булангай эбэрнүүдһээ абяа дуулабаб. ¹⁴Томо бүрээ барихан зургаадахи эльгээмэлдэ тэрэ абяан иигэжэ хэлэбэ:

«Агууехэ Евфрат мүрэнэй шадар хүлээтэй Бурханай дүрбэн эльгээмэлнүүдые таби». ¹⁵Тиихэдэнь хүн зоной гурбанай нэгэ хубиие алаха хюдаха эгээл тэрэ саг, үдэрөө, һара, жэлээ хүлээжэ, бэлэн болоод байһан тэдэ дүрбэн эльгээмэлнүүд табигдаа бэлэй. ¹⁶Хамта

дээрээ тэндэнь хоёр зуун сая морин сэрэгшэд байна гэлсэхые дуулааб. ¹⁷ Эдэ моринуудай, унаад ябаһан хүнүүдэйнэ иимэ байхые харааб: сэрэгшэдынэ гал улаан, миндаргадад адли сэнхир, хүхэртэл адли шара хуягуудые үмдөөд байгаа. Моридойнэ тархи толгой арсаланайхидал адли һэн. Моридой аман сооһоо гал, утаан, хүхэр гаража байгаа. ¹⁸ Үхэлэй аюулта гал, утаан, хүхэр гурбан зүйлнүүд моридой аманһаа гараад, хүн зоной гурбанай нэгэ хубиие алаа хюдаа һэн. ¹⁹ Юундэб гэбэл, моридойнэ хүсэ шадал тэдэнэй амандань, һүүлнүүдтэнь байгаа. Тэдэнэй һүүлнүүдынэ тархи толгойнуудтай могойнуудай түхэлтэй һэн, тиимэ һүүлнүүдээрээ хүн зониие хорложо аладаг бэлэй. ²⁰ Иимэ ехэ аюул зоболондо орожо үхөөгүй үлэһэн хүнүүд өөһэдынгөө нүгэлтэ хара хэрэгүүдые үйлэдэжэл байгаа. Тэдэнэр алта, мүнгөөр, гуули зэдээр, шулуу модоор хэгдэһэн худал хуурмаг шүтөөнүүдтэ, ада шүдхэрнүүдтэ урдынхидаал адляар һүгэдэн мүргэһөөр байгаа. Харин тиихэдэ тэдэ хуурмаг шүтөөнүүдынэ юумэ үзэжэ харажашье, дуулажа шагнажашье, ябажа хүдэлжэшые шадахагүй юм. ²¹ Бусад үлэһэн тэдэ зон хүнүүдые аладаг хюдадаг, эльбэ шэди үйлэдэдэг, забхай зальхай ябадал гаргадаг, хулгай худал хэдэг ябадалаа орхёогүй байһаар.

Гартаа багахан ном бариһан эльгээмэл

10 ¹ Удаань үүлэ нэмэрһэн бата хүсэтэй ондоо нэгэ эльгээмэлэй тэнгэриһээ буужа ябахые харааб. Толгой дээгүүрнэ һолонго татанхай, нюур шарайнэ наран шэнги, хоёр хүлынэ гал баханануудтал адли һэн. ² Дэлгээтэй багахан ном тэрэнэй гарта байба. Тиигээд баруун хүлөө далай дээрэ, зүүн хүлөө газар дээрэ табиба. ³ Тиигээд Бурханай Эльгээмэл арсаланай хэрхирһэндэл шангаар хашхарба. Тиихэдэнь долоон аянганууд өөһэдынгөө абяагаар дуугаралдаба. ⁴ Тиигэжэ дуугаралдахадань, юумэ бэшэхээ бэлдээд байгаа, теэд: «Долоон аянгануудай хэлээшые бү бэшэ, нюугаад бай», – гэжэ тэнгэри дээрэһээ хэлэхые дуулааб. ⁵ Далай дээрэ, газар дээрэ байхыенэ минии хараһан Бурханай Эльгээмэл баруун гараа огторгой өөдэ үргэбэ. ⁶ Огторгой тэнгэриие, газар дэлхэйе, уһан далайе, тэндэхи бүхы юумэнүүдые заяаһан хэтэ мүнхэдөө Амидаран мандагшын алдар нэрээр Бурханай тэрэ эльгээмэл иигэжэ тангариглан хэлэбэ: «Саашадаа удааруулагдахагүй. ⁷ Теэд Бурханай долоодохи эльгээмэлэй бүрээгээ дуугаргахадань, Бурханай нюуса түсэб бүрин бэлүүлэгдэхэ. Бурхан энэ түсэб тухай

өөрынгөө зарасанар-лүндэншэдтэ урид мэдээсэлэн байгаа». ⁸ Удаань тэнгэригээ дуулдаһан абьяан дахин намда хандажа: «Далай газар хоёрой дээрэ зогсожо байһан эльгээмэлһээ дэлгээтэй ном ошожо аба», – гэбэ. ⁹ Би тэрэ эльгээмэлдэ ошожо, дэлгээтэй номыень эрибэб. Тэрэ намда иигэжэ хэлэбэ: «Энэ ном абаад эдижэрхи. Хотогод гэдэһэндэшни гашуун байха, теэд аман соошни зүгын бал шэнги амтатай байха». ¹⁰ Бурханай Эльгээмэлэй гарһаа номыень абаад эдижэрхибэб. Аман доторни ороходоо, зүгын бал шэнги амтатай байһанаа, харин тэрэ номоо эдихэдэмни, хотогод гэдэһэн соомни ехэ гашуун байгаа бэлэй. ¹¹ Тиигээд Бурханай Эльгээмэл намда иигэжэ айладхан хэлэһэн юм: «Ши олон ондоо арадууд, үндэһэ яһатан, элдэб янзын хэлэтэй зон, хаашуул тухай урид мэдэжэ, дахин саашадаа абарал буулгадаг болохош».

Хоёр гэршэнэр

11 ¹ Газар хэмжэдэг модон шэнги таяг намда үгөөд, иигэжэ хэлэбэд: «Ши өөдөө бодоод, Һүмэ, тахилай шэрээ хоёрые хэмжэ, тиигээд энэ Һүмэ дотор хэр олон хүнүүд Бурханда мүргэнэб гэжэ тооло. ² Теэд Һүмын гадаада хорёоо бү тоололсо, бү хэмжэ, юуб гэбэл, тэрэ хорёонь бусад арадуудай мэдэлдэ үгтэнхэй юм. Тэдэ хүнүүд нангин хотые дүшэн хоёр һарын туршада хүлөөрөө гэшхэжэ дэбһэжэ ябаха. ³ Би хоёр гэршэнэрээ эльгээхэб: тэдэмни уйдхар гашуудалай хубсаһа үмдөөд, мянга хоёр зуун жаран үдэр соо Бурханай үгэ айладхажа ябаха». ⁴ Эдэ лүндэншэд газарай Эзэнэй урдахи хоёр дэн, хоёр олива модон мүн гээшэ. ⁵ Эдэ хоёр лүндэншэдые хорлохоёо һанаа һаань, тэдэ хоёрой аманһаа гал дүлэн гаража, дайсадыень үгы хэжэрхидэг байна. Эдэ хоёрто хоро хэхээ һанагшад үхэн хосорхо үйлэтэй юм. ⁶ Тэдэ хоёрой Бурханай үгэ айладхажа байха бүхы үдэрнүүдтэнь хура бороогой орохогүйн тула тэдэндэ огторгой тэнгэриие хаажархиха эрхэ засаг үгтэхэ; уһа мүрэнүүдые шуһан болгожорхихо, газар дэлхэйдэ өөһэдынгөө дура зоргоор гай аюул тохёолдуулха эрхэ засаг үгтэхэ. ⁷ Тэдэ хоёр лүндэншэдэй гэршэлгээ хэжэ дүүргэхэдэнь, оёоргүй нүхэн сооһоо ан арьяатан гаража ерээд, тэдэ хоёртой дайралдан, алаха хюдаха байна. ⁸ Тэдэнэй үхэһэн бэень Содом гү, али Египедтэл адли муу суутай хотонуудай нэгэ тон ехэ хотын гудамжада хэбтэхэ. Тэрэ хотодо мүн тэдэнэй Дээдын Эзэн хэрээһэндэ хадагдажа саазалуулаа һэн. ⁹ Али бүхы арадууд, угсаатан, элдэб янзын хэлэтэй зон, бүхы үндэһэ яһатан

тэдэ хоёрой үхэхэн бэеые гурба хахад үдэрэй туршада хонишоон хаража байгаа, хүдөөлүүлхыень зүбшөөнгүй байлгаа һэн. ¹⁰ Газар дэлхэйдэ һуудаг хүнүүд хүхилдэн баясажа, найр зугаа хэнэ, бэе бээдээ бэлэг сэлэгүүдые барина, юундэб гэбэл, эдэ хоёр лүндэншэд газар дэлхэй дээрэ һуугшадые тамалан хэхээдэг байгаа. ¹¹ Теэд гурба хахад үдэрэй үнгэрхэдэ тэдэ хоёрой досоонь амидарал үгэдэг Бурханай хүлдэ орожо, мүнөөхи хоёрынь хүл дээрээ бодошобо, тиэхэдэнь тэндэ хаража байһан хүнүүд айхын ехээр айжа мэгдээ бэлэй. ¹² «Наашаа дэгдэгты!» гэжэ тэнгэри дээрэхээ шангаар дуугарха абьяан лүндэншэдтэ дулдаба. Тиин дайсадайнгаа хараһаар байтарынь, лүндэншэд үүлэнэй дээгүүр тэнгэри өөдэ дэгдэшэбэ. ¹³ Тэрэ үедэнь газар ехээр хүдэлжэ, хотын арбанай нэгэ хубинь һандарба. Долоон мянган хүн газарай хүдэлөөнһөө боложо үхэбэ, бэшэниинь айжа мэгдээд, Тэнгэрийн Бурхание алдаршуулан магтаба. ¹⁴ Хоёрдохи гай аюул үнгэрбэ. Тиигээд гурбадахи гай аюул дүгэлшэбэ!

Долоодохи бүрээ

¹⁵ Долоодохи эльгээмэл бүрээгээ дуугаргаба. Тиэхэдэнь тэнгэри-дэ иигэжэ шангаар дуугарха абьяанууд дулдаба:

– Дэлхэйн засаг түрэ Эзэн Бурханаймнай, тэрэнэй Табисууртын засаг түрэ болоо. Тэрэ засаг түрые Бурхан хэтэ мүнхэдөө барижа байха.

¹⁶ Бурханай урдахи хаан шэрээ дээрэ һууһан хорин дүрбэн ахамандууд Бурханай урда нюураараа уруугаа хаража газарта унаад, хүгэдэн мүргэбэ. ¹⁷ Тэдэ иигэжэ хэлэбэ:

– Хододоо байһан, мүнөөшье байгаа Хамагые зонхилогшо Бурхан, шамда баяр баясхалан хүргэнэбди, ушарынь гэбэл, ши агууехэ хүр хүсээ харуулжа, Хаан болобош. ¹⁸ Бусад арадууд уур сухалаа хүрэбэ, баһа шишье уур сухалаа хүрэбэш – үхэхэн хүнүүдые шүүбэрилхэ сагшни, шинии зарасанар-лүндэншэдтэ, шинии арюун нангин арадта, шинии алдар нэрые хүндэлдэг юрыншье, засаг баридагышье хүнүүдтэ шагнал хайра үршөөхэ сагшни, газар дайда усадхан хосороогшодые үгы хэхэ сагшни хүрэхэ ерэбэ. ¹⁹ Тэнгэри дээрэхи Һүмэ тайлдан нээгдэжэ, тэрэнэй Хэлсээнэй абдарынь Һүмэ дотор харагдаба. Тиин гал ехэ сахилгаан сахилба, оог шууяан болобо, тэнгэрийн дуун нэрьбэ, газар хүдэлбэ, мүндэр ехээр оробо.

Эхэнэр луу хоёр тухай

12 ¹Тиин тэнгэри дээрэ гайхамшаг дүлгэ тэмдэг үзэгдэбэ: нараар хубсаһа хэжэ үмдэһэн эхэнэр; тэрэнэй хүл доронь һара, толгойдонь – арбан хоёр одо мүшэтэй титим малгай. ²Хүл хүндэ байһан тэрэ эхэнэр түрэхын урдахана тохёолдодог үбшэнһөө зобо-жо хашхарна. ³Тэнгэридэ баһа ондоо нэгэ дүлгэ тэмдэг бии болобо: долоон толгойтой, арбан эбэртэй, толгойнууд дээрээ долоон титимтэй томо гэгшын улаан луу харагдаба. ⁴Тэрэнь одо мүшэдэй гурбанай нэгэ хубиие һүүлээрээ хамаад, тэнгэриһээ газарта хаяба. Үхибүүнэй түрэмсөөр залгижархихаяа бэлдээд, нарайлха эхэнэрэй урда луу зогсожо байба. ⁵Нарайлха эхэнэр хүбүү түрэбэ. Тэрэнь бүхы арадуудые түмэр таягаараа ударидан зонхилжо байха юм. Тэрэ хүбүүниинь Бурханда, Бурханай хаан шэрээдэ дэгдүүлэн абаашагдаба. ⁶Харин эхэнэр сүл губи руу тэрьелжэ ошобо. Тэндэ эхэнэрэй байха байрые Бурхан түхээрээ һэн. Мянга хоёр зуун жаран үдэрэй турша соо тэрэ байрадань эхэнэрые харууһалжа байха юм.

⁷Харин тэнгэри дээрэ дайн сэрэг боложо байгаа: Михаил өөрынгөө эльгээмэлнүүдтэй суг луугай урдаһаа тэмсэн дайралдаа һэн. Луу өөрынгөө эльгээмэлнүүдтэй хамта дайралдаа. ⁸Тээд луу эльгээмэлнүүдтэйгээ диилдэжэ, тэнгэридэ байха һуури байраяа алдаа һэн. ⁹Юртэмсэ дэлхэйн бүхы зониие мэхэлжэ хууража байһан шолмос, сатана гэжэ нэрэтэй ехэ үнинэй Могой бологшо луу тэнгэриһээ газарта шэдүүлһэн, тэрээнтэйгээ хамта эльгээмэлнүүдыньшые шэдүүлһэн юм. ¹⁰Тэнгэри дээрэхээ шангаар хэлэһэн иимэ үгэнүүдые би дуулаа һэм: – Одоошые Бурханай хүнүүдэй абарагдаха саг ерэбэ. Одоошые манай Бурхан засаг түрые абаад, хаан болохо. Тиин Бурханай Табисуурта бүхы дэлхэе ударидан зонхилжо байха. Юуб гэбэл, бидэнэй аха дүүнэрые Бурханаймнай урда үдэр һүниггүй гэмнэгшэ газар руу шэдүүлэн унаба. ¹¹Манай аха дүүнэр Үргэлэй Хурьганай шуһаар, мүн гэршэлһэн үгөөрөө тэрэ гэмнэгшые илаа. Аха дүүнэрнай ами наһаа гамнаагүй, үхэлһөө айгаагүй. ¹²Огторгой тэнгэри, тэндэ байгшад бултадаа баясан хүхигты! Газар дэлхэйнхидтэ, уһан далайнхидта гашуудал зоболон болохонь! Айхабтар ехэ уур сухалтай шолмос танда бууба: хаһа сагынь бага үлөө гэжэ тэрэ шолмос ойлогоо. ¹³Луу газарта шэдүүлһэнээ мэдээд, хүбүү түрэхэн эхэнэрые хойноһоонь мүшхэн намнаба. ¹⁴Болзоото сүл губи газартаа лууда баригдангүй ниидэжэ ошохынь тула тэрэ эхэнэртэ бүргэд шубуунай

аргагүй томо хоёр дали үгтэбэ. Гурба хахад жэл соо тэрэ эхэнэрые харууналжа байха юм. ¹⁵ Далай ехэ уһанда абтажа тэрэ эхэнэрэй урдашахын тула тэрэнэй хойноһоонь луу хадаа гол мурэн шэнги ехэ уһа аман сооһоо гаргажархиба. ¹⁶ Теэд эхэнэртэ газар туһалаа: луугай гаргаһан уһа мурэниие газар амаа ангайлгаад уужархиба. ¹⁷ Тиихэдэнь луу тэрэ эхэнэртэ ехээр сухалдан хэрүүлхэжэ, эхэнэрэй бусад үхибүүдтэй дайралдахаяа ошобо. Тэдэ үхибүүдын Бурханай захяа заабариие дүүргэжэ, Иисусай үнэн зүб хургаалые үнэн сэхээр сахидаг һэн. ¹⁸ Тэрэ луу далайн эрьедэ зогсожо байгаа.

Хоёр арьяатан

13 ¹ Далай сооһоо арбан эбэртэй, долоон толгойтой арьяатанай гаража ябахые харааб. Эбэрнүүд дээрэнь арбан титим табяаттай, толгой дээрэнь Бурханиие доромжолһон нэрэнүүд бэшээтэй байба. ² Минии хараһан арьяатан болбол эрбэдэй түхэлтэй, хүлнүүдын баабгайнхитай адлишуу, аманиинь арсаланайхи шэнги байгаа бэлэй. Тэрэ арьяатанда луу өрынгөө хаба шадал, хаан шэрээ, тон ехэ түрэ засаг үгэбэ. ³ Арьяатанай нэгэ толгойнь үхэлэй ехээр шархатан байбашье, эдэгэжэ, газар дэлхэйн хүнүүд бултадаа гайхалдан, тэрэ арьяатанай хойноһоо дахаба. ⁴ Тэдэ хүнүүд арьяатанда засаг үгэһэн луугай урда хүгэдэн мүргөөд, мүн арьяатанда хүгэдэн мүргэхэ зуураа, иигэжэ хэлэбэ: «Энэ арьяатантай тэнсэхэ амитад олдохо аал? Энээнтэй дайралдажа шадаха хүн амитан байха аал?» ⁵ Өөрыгөө магтаха, Бурханиие доромжолхо эрхэ засаг тэрэ арьяатанда үгтэһэн байна. Дүшэн хоёр һара соо тиимэ юумэ хэжэ байха эрхэ тэрээндэ олгогдоһон юм. ⁶ Бурханиие муушалхаяа, тэрэнэй алдар нэрые, майхан байрые, тэнгэридэ һуугшадые муушалхаяа тэрэ арьяатан амаа ангайлгаба. ⁷ Бурханай табисуурта арад зоной урдаһаа тэмсэжэ, тэрэ зониие илаха эрхэ засаг тус арьяатанда үгтэнхэй. Алишье угсаатаниие, арадуудые, элдэб янзын хэлэтэй зониие, бүхы яһатан үндэһэтэниие захиран зонхилжо байха эрхэ засаг тэрэ арьяатанда үгтэнхэй. ⁸ Үргэлэй Хурьганай тэмдэглэдэг амидаралай ном соо нэрэнүүдэнь бэшэгдээгүй бүхы газар дайдын зон тэрэ арьяатанда хүгэдэн мүргэхэ. Үргэлэй Хурьган тахил болгогдон Бурханда үргэгдэхэ юм гэжэ газар дэлхэйн бүтээгдэхэнээ түрүүн хараалагдаа һэн. ⁹ Шэхэтэй юм хаа, шагнаг лэ! ¹⁰ Плендэ орохо хубитай хүн плендэ орохо. Һэлмээр сабшуулжа үхэхэ хубитай хүн Һэлмээр сабшуулжа үхэхэ. Бурханай табисуурта арад зон хатуу зоригтой, үнэн

шударгы байха ёһотой гэжэ эдэ үгэнүүдһээ элирнэ бшуу! ¹¹ Удаань газар дороһоо гаража ябаһан ондоо арьяатаниие харабаб. Тэрэнь Үргэлэй Хурьгандал адли хоёр эбэртэй байгаа һэн, теэд луу шэнгээр дуугараа. ¹² Энэ арьяатаниинь үхэтэрөө шархатуулаад эдэгэ-һэн нэгэдэхи арьяатанда мүргэгты гэжэ газар дэлхэйн бүхы зониие баадхана. Хоёрдохи арьяатаниинь нэгэдэхи арьяатанай нэрээр, тэрэнэй эрхэ засагые хэрэглэн, тиимэ юумэ хэнэ. ¹³ Хоёрдохи арьяатаниинь гайхамшаг ехэ дүлгэ тэмдэгүүдые үйлэдэнэ: хүнүүдэй хараһаар байтар тэнгэри дээрэһээ газар уруу гал дүлэ буулгана. ¹⁴ Тиин энэнь нэгэдэхи арьяатанай нэрээр гайхамшаг ехэ дүлгэ тэмдэгүүдые харуулжа, газар дэлхэйн зониие мэхэлнэ. Һэлмээр сабшуулаад амидырһан арьяатанай нэрэ хүндэдэ тэрэнэй хүрэг дүрсэ хэгты гэжэ газар дэлхэйн зондо хоёрдохи арьяатан захиралта үгэбэ. ¹⁵ Нэгэдэхи арьяатанай хүрэг дүрсые амидыруулха эрхэ, тэрэ хүрэг дүрсые юумэ хэлэжэ шададаг болгохо эрхэ, нэгэдэхи арьяатанай хүрэг дүрсэдэ хүгэдэн мүргэдэггүй хүнүүдые алаха эрхэ хоёрдохи арьяатанда үгтэһэн байгаа. ¹⁶ Энэ хоёрдохи арьяатан бүхы хүнүүдые: юрыншые, засаг баридагыше, баяншые, үгытэйшые уладые, эрхэ сүлөөтэйшые зониие, богоол барлагуудыешые баруун гартаа гү, али духа магнайдаа тамга табюулха гэжэ баадхадаг бэлэй. ¹⁷ Тамгагүй һаа, хэншые юумэ наймаалха, худалдажа абаха эрхэгүй һэн. Тамга гээшэнь арьяатанай нэрэ гү, али тэрэнэй нэрын тоо мүн. ¹⁸ Ихэдээ мэргэн бодолтой ябахые уряална гээшэ: ухаансар хүниинь арьяатанай тоое бодожо гаргаг лэ. Энэ тоонь, хүнэйхидэл адли, зургаан зуун жаран зургаа юм.

Үргэлэй Хурьган болон тэрэндэ абаруулһан хүнүүд

14 ¹ Би иимэ юумэ харааб: Сион хада дээрэ Үргэлэй Хурьган зогсоно, тэрэнтэй хамта зуун дүшэн дүрбэн мянган хүнүүдэй духада Үргэлэй Хурьганай нэрэ, тэрэнэй Эсэгийн нэрэ бэшээтэй. ² Уһан хүүюур шэнги, тэнгэриин дуун шэнги абьяан огторгойһоо дуулдаба. Намда тэрэ абьяан ятагаар наадахадаа, ятагашадай наададаг дуундал адляар һанагдаба. ³ Тэдэнэр хаан шэрээгэй урда, дүрбэн амитадай болон ахаматуудай урда байгаад, магтаал дуу зэдэлүүлнэ. Газар дэлхэйһээ сүлөөлэгдэһэн зуун дүшэн дүрбэн мянган тэдэ хүнүүдһээ бэшэ ондоо хэншые эдэ дуунуудые дуулажа шадаагүй. ⁴ Тэдэ хүнүүд эхэнэрнүүдээр орёһолдон бээ бузарлаагүй, гэр бүлэ болоогүй зандаа үлөө, Үргэлэй Хурьганай ошоһон тээшэ дахажа

ябаа. Гансал тэдэ хүнүүд газар дэлхэйһээ абтан абарагдаһан байгаа. Тэдэнэр Бурханда болон Хурьганда үргэһэн түрүүшын ургасын дээжэ мэтэ бэлэй. ⁵Тэдэнэр хээээдэшые худал хуурмаг үгэ хэлэдэггүй, гэм зэмэгүй байһан юм.

⁶Газар дэлхэй дээрэ һуугшадта, али бүхы арадуудта, угсаатанда, элдэб янзын хэлэтэй зондо, бүхы үндэһэ яһатанда хэтэ мүнхын Һайн Мэдээсэл дуулгахын тула Бурханай үшөө нэгэ эльгээмэлэй огторгойдо элин ниидэжэ ябахые би удаань харааб. ⁷«Бурханһаа айжа түбэгшөөжэ байгыт! Тэрэнэй алдар солые суурхуулан магтажа байгыт! Юуб гэбэл, Бурханай зарга шүүбэри хэхэ сагынь ерээд байнал! Огторгой тэнгэриие, газар дайдые, далай, мурэнүүдые Бүтээгшын урда һүгэдэн мүргыт!» ⁸Дары хойноһоонь баһа ондоо, хоёрдохы эльгээмэл иигэжэ хашхаран ниидэжэ ябаа: «Бүхы арад үндэһэтэниие забхайралайнгаа бузар архи уулгажа хорлоһон агуу ниислэл Вавилон хото хосороо, хосороо!» ⁹Тэдэнэй хойноһоо баһа ондоо, гурбадахи эльгээмэл шанга шангаар иигэжэ хашхаран ооглобо: «Арьяатанда, тэрэнэй хүрэг дүрсэдэ мүргэн һүгэдэжэ, духадаа гү, али баруун гартаа тамгатай байгаа наа, ¹⁰Бурханай уур сүхалай аягаһаа тэрэнэй уур сүхалай холисогүй сэбэр архи ууха, тэдэ хүнүүдые арюун нангин эльгээмэлнүүдэй урда, Үргэлэй Хурьганай урда асараад, гал түймэр руу, хүхэрэй хүхэ дүлэн руу хаяжа, тамалан хэхээхэ. ¹¹Тэдэниие зобоогшо галай хара утаан хэтын хэтэдэ өөдөө хөөрэн дэгдэхэ, тиин арьяатанда, тэрэнэй хүрэг дүрсэдэ һүгэдэн мүргэгшэдтэ, тэрэнэй нэрэтэй тамгатайшуулда үдэр һүнигүй амар заяа үзүүлэгдэхгүй». ¹²Бурханай табисуурта зон, Бурханай захяа заабари сахижа, Иисуста үнэн сэхэ ябадаг хүнүүд тэсэбэритэй шанга байха ёһотой гэжэ эдэ үгэнүүдһээ элирнэ бшуу! ¹³Удаань огторгойһоо иигэжэ дуугарха абяа дуулааб: «Буулгажа бэшээд аба: энэ сагһаа эхилэн Дээдын Эзэндэ үнэн сэхэ байжа наһа бараһан хүнүүд ямар жаргалтайб даа!» «Тиимэл даа, тэдэнэр хүндэ хүшэр ажалһаа одоол сүлөөржэ амархань, юундэб гэбэл, тэдэнэй бүтээһэн буянтай һайхан хэрэгүүдынь хойноһоонь ябалсана гэжэ Нангин Һүлдэ хэлэнэ».

Ургаса

¹⁴Иимэ юумэ харааб: сагаан үүлэн, тэрэнэй дээрэнь хүнтэй адлирхуу амитан һууна. Толгой дээрэнь алтан титим, гартаа хурса хадуур баринхай. ¹⁵Һүмэ сооһоо баһа нэгэ эльгээмэл гараад, үүлэн дээрэ һуугшада хандан, иигэжэ шангаар ооглон дуугарба: «Хадуураа

наашань эльгээ, тиигээд таряагаа хада! Газар дээрэ ургаса таряан эдеэшээ – хуряаха саг ерээ!»¹⁶ Үүлэн дээрэ Ёуугаашань хадуураа газар уруу шэдэбэ. Тиихэдэнь газар дээрэхи таряан хадагдашаба.¹⁷ Ондоо нэгэ эльгээмэл тэнгэрийн Һүмэ сооһоо гараба, баһал хурса хадуур гартаа баринхай.¹⁸ Гал гуламта даажа байһан баһа нэгэ эльгээмэл Һүмын үргэлэй газарһаа гараба. Хурса хадууртай эльгээмэлдэ хандан, тэрэнь иигэжэ хашхарба: «Хурса хадуураа абаад яба, тиигээд газар дээрэ ургадаг үзэмэй модоной жэмэсүүдые хада, тэдэнь эдеэшээд байна». ¹⁹ Тэрэ эльгээмэлынь хадуураа газар уруу шэдэжэ, газарай үзэмэй баглаануудые отолоод, үзэмэй шүүһэ шахадаг, Бурханай уур сухалай томо тогоо худар шэдэжэрхибэ. ²⁰ Хотын гадна оршоһон томо мандагар тогоон соо үзэмэй баглаа жэмэсүүдые низа тэһэ дэбһэбэ, тиихэдэнь тогооной халитар улаан шуһан урдажа, мориной хазаарта хүрэмөөр гурбан зуун хараа модоной зайда халин тарашаба.

Һүүлшын долоон гай аюулнууд

15¹ Удаань баһа нэгэ аргагүй ехэ, гайхамшаг дүлгэ тэмдэг: Һүүлшын долоон гай аюултай долоон эльгээмэлнүүдые тэнгэри дээрэ харабаб. Юундэ Һүүлшын гай аюул юм гэбэл, Бурханай уур сухалынь эдэнээр түгэсэһэн байна. ² Галтай холиһон шэл далай шэнги юумэ харабаб. Энэ шэл далайн хажууда арьяатаниие, тэрэней хүрэг дүрсые, арьяатанай нэрын тоое илаашад байна. Тэдэнэр тус бүридөө Бурханай ятага баряад зогсоно. ³ Тиихэ зуураа, Бурханай зараса Моисейн дууе, Үргэлэй Хурьганай иимэ дууе дууланад: шинии бүтээһэн хэрэг аргагүй ехэл, гайхалтай һайхан лэ, Хамагые зонхилогшо Дээдын Бурхан! Арадуудай Хаан! Шинии хэрэгүүд үнэхөөр зүб, үнэн сэхэ лэ! ⁴ Хэн шамһаа айхагүйб даа, Эзэн Бурхан, шинии нэрэ солые хэн алдаршуулан магтахагүйб даа?! Гансал ши нангин гэгээн ха юмши! Бүхы арадууд шинии урда һүгэдэн унажа мүргэхэл. Юундэб гэбэл, шинии үнэн зүб хэрэгые бултадаа үзэһэн хараһан ха юм. ⁵ Удаань иимэ юумэ харааб: тэнгэри дээрэ Гэршэлгын Майханай Хамагай Нангин газарынь нээгдэбэ. ⁶ Тэндэһээ долоон гай аюултай долоон эльгээмэлнүүд гараба. Тэдэнэр сэбэрхэн, ялагар нарин улһаар оёһон хубсаһа үмдэнхэй, сээжээрээ алтан бэһэ бэһэлэнхэй байба. ⁷ Дүрбэн амитадай нэгэниинь долоон эльгээгдэмэлнүүдтэ хэтэ мүнхэ оршодог Бурханай угаа ехэ уур сухалай долоон алтан аягануудые барюулба. ⁸ Һүмэнь Бурханай Алдар

солын, тэрэнэй Хүсэ шадалай утаагаар дүүрэшэбэ, тиин долоон эльгээмэлнүүдэй долоон гай аюулай дууһан зайлатар Һүмэдэ хэншые орожо шадаагүй.

Бурханай уур сухалай долоон аяга

16 ¹Удаань долоон эльгээмэлнүүдтэ хандан, Һүмэ доторһоо шангаар иигэжэ хэлэхые дуулааб: «Эндэһээ ошожо, Бурханай уур сухалай долоон аяга соохие газарта адхагты!» ²Нэгэдэхи эльгээмэл өөрынгөө аяга соохие газарта адхаба, тиигэмсээрнь арьяатанай тамгатай хүнүүдэй ба арьяатанай дүрсэдэ хүгэдэн мүргэгшэдэй бэедэнь бузар муухай эдеэртэй шарханууд гарашаба. ³Хоёрдохи эльгээмэл өөрынгөө аяга соохие далайда адхаба, далай тиихэдэнь үхэхэн хүнүүдэй шуһан шэнги боложо, далайн амитад бултадаа хосорон халашаба. ⁴Гурбадахи эльгээмэл өөрынгөө аяга соохие гал мүрэн, уһа горхо руу адхаба, тиихэдэнь гол мүрэнүүд, уһа горхонууд улаан шуһан болошобо. ⁵Уһа мүрэнүүдэй эльгээмэлэй иигэжэ хэлэхыень дуулааб: мүнөөнэйшые, урданайшые Нангин гэгээн Бурхан, ши, зүбөөр иигэжэ шиидхэхэн байнаш: ⁶Тэдэнэр Бурханай арадай, лүндэншэдэй улаан шуһа адхаруулаа, тиихэдэнь ши тэдэндэ шуһа уулгажа, тэдэнэй гэмые зүб амсуулааш! ⁷Тахилай шэрээгэй хажууһаа иигэжэ хэлэхыень би дуулааб: Тиимэ даа, Хамагые зонхилогшо Эзэн Бурхан, шинии гаргаһан шиидхэбэринүүд үнэн зүб байна! ⁸Дүрбэдэхи эльгээмэл өөрынгөө аяга соохие нара руу адхаба, тиихэдэнь хүнүүдые шатааха эрхэ наранда үгтэхэн байна. ⁹Аргагүй халуун болоходонь, хүнүүд шататараа халуудажа байгаа бэлэй. Иимэ ехэ гай аюул даажа байһан Бурханай нэрые хүнүүд хараалай муугаар хараагаа һэн. Теэд тэдэ хүнүүд гэм хэхэеэ болёогүй, Бурхание магтаагүй бэлэй. ¹⁰Табадахи эльгээмэл өөрынгөө аяга соохие арьяатанай хаан шэрээ руу адхаба, тиихэдэнь арьяатанай засаг түрэ соо балай харанхы болошобо. Тэнсэлгүй үбшэнтэй байһан туладань тэндэхи хүнүүд хэлээ хазажа байбад. ¹¹Тиин үбшэн зоболон, яра шарха асарһанайнь түлөө тэдэнэр Тэнгэрийн Бурхание хараалай муугаар хараажа байгаа. Теэд тэдэ хүнүүд гэм хэхэеэ болёогүй һэн. ¹²Зургаадахи эльгээмэл өөрынгөө аяга соохие асари ехэ Евфрат мүрэн руу адхаба. Тиихэдэнь тэрэ мүрэн хатажа, Зүүн зүгэй хаашуулай хуурай газараар ябаха харгы гаргагдашаба. ¹³Луугай аман сооһоо, арьяатанай аман сооһоо, худал хуурмаг лүндэншын аман сооһоо бахын түхэлтэй гурбан хүнэхэ хүлдэнүүдэй гаража байхые

харабаб. ¹⁴ Эдэ болбол дүлгэ тэмдэг үйлэдэдэг ада шүдхэрнүүдэй хүнэнэ хүлдэнүүд мүн: Хамагыг зонхилогшо Бурханай агуухэ Үдэртэ дайралдахыень бүхы замбуулин дайдын хаашуулыг суглуулхаяа тэдэ ошожо ябаа. ¹⁵ Обёоржо байгты! Би хулгайшан шэнгээр

гэб гэнтэ орожо ерэхэб. Хубсаһаа бэлдээд,

һэргэлэн байһан хүн жаргалтай:

тэрэ хүн улад зоной дунда

салдаган нюсэгөөр гаража, нэрээ гутаахагүйл.

¹⁶ Тиин гурбан хүнэнэ хүлдэнүүдынь еврей хэлээр Армагедон гэжэ нэрэтэй газарта бүхы хаануудыг суглуулба. ¹⁷ Долоодохи эльгээмэл өөрынгөө аяга соохиё агаар руу сасан адхаба. Тиихэдэнь «Бүтэбэ даа!» – гэхэн шанга абьяан Хүмын хаан шэрээгэй зүгһөө дуулдаба. ¹⁸ Сахилгаан сахилгаалба, ооглоон хашхараан болохонь дуулдаба, тэнгэри дуугарба, газар хүдэлбэ. Дэлхэй дээрэ хүн амитанай бии болохоһоо нааша тиимэ ехээр газар хүдэлөөгүй юм. ¹⁹ Аргагүй томо хото гурбан хуби боложо бутаран хандаршаба, бусад арадуудай хотонууд хяа бута хүрэн унашаба. Агуу ниислэл Вавилон тухай Бурхан ханажа, аргагүй ехэ уур сүхалайнгаа аягатай архиё тэрэ ниислэлдэ уулгаба. ²⁰ Ольторог аралнууд баран булта тэрьелшэбэ, хада уулануудшыё олодохоёо болишобо. ²¹ Огторгой тэнгэрийнээ дүшэн килограмм шахуу болохо томо гэгшын мүндэр орожо, хүнүүд дээрэ унаба. Теэд аргагүй томо мүндэр оруулжа, аюул тодхор асарһанайнь түлөө Бурханийн хүнүүд хараалай муугаар харааба. Юундэб гэбэл, айхабтар ехэ гай аюул тохёолдоо бшуу.

Янхан эмэ арьяатан хоёр

17 ¹ Долоон аягатай долоон эльгээмэлнүүдэй нэгэниинь ерээд, намтай хөөрэлдэжэ эхилбэ: «Наашаа ерэ даа, олон гол мүрэнүүдэй эрьедэ һуугша аргагүй забхай Янхан эмые ямар хатуу шанга хэһээлтэдэ оруулха байһыень шамда харуулхамни. ² Газар дэлхэйн хаашуул тэрэ янхантай холбоорилдон забхайрдаг, газар дэлхэйнхид тэрэ эмын зальхайралай архиё нөгтосороо уудаг байгаа». ³ Удаань тэрэ эльгээмэл Нангин Хүлдэтэй болгогдоһон намайе сүл губида асарба. Бурханийн доромжолһон нэрэнүүдэй бэшээтэй, улаан арьяатанай дээрэ һуужа байһан эхэнэрыг харабаб. Тэрэ арьяатан долоон толгойтой, арбан эбэртэй хэн. ⁴ Тэрэ эхэнэр улаабтар хүхэ ба шад улаан бүдөөр оёһон хубсаһатай, шэжэр алта, эрдэниин шулуу, һубад һуба ялалзуулан зүүгээд байба. Гартаа алтан хундага баринхай.

Тэрэ хундага соонь янхан эмын намуу зальхай ябадалай жэрхэштэй муухай, бузар булай юумэнүүд хэгдээд байгаа. ⁵ Духа дээрэнь нюуса удхатайгаар иигэжэ бэшээтэй: «Агуу ниислэл Вавилон – газар дэлхэйн янхан эмэнүүдэй жэрхэштэй муухай юумэнүүдэй эхэ». ⁶ Бурханай арад зоной шуһа, Иисусай гэршэнэрэй шуһа уугаад, тэрэ эхэнэрэй ногтошоод байхые харахадаа, гайхахын ехээр гайхааб. ⁷ Эльгээмэл иигэжэ намда хэлэбэ: «Ши юундэ гайхааби? Эхэнэрэй нюусые, тэрэ эхэнэрэй унажа ябагша долоон толгойтой, арбан эбэртэй арьяатанай нюусые, шамда тайлбарилан хэлэжэ үгэхэб. ⁸ Шинии хараһан арьяатан бии байһанаа, мүнөө үгы болонхой. Оёоргүй гүнзэгы нүхэн сооһоо һаяар гаража ерэхэ, теэд тэрэ хосорон халаха. Дэлхэйн бүтээгдэхэнээ нааша угай дэбтэртэ бэшэгдээгүй газар дэлхэйнхид тэрэ арьяатаниие харахадаа, хүхихэ баярлаха, ушарынь гэбэл, бии байһанаа, үгы болоод, дахин бии болохо арьяатаниие хараха юм. ⁹ Эндэ сэсэн ухаан бодол хэрэгтэй. Долоон толгой гээшэнь эхэнэрэй һуугша долоон добо гүбээнүүдын мүн. Тэдэ долоон гүбээнүүдын мүн баһа долоон хаанууд гээшэ. ¹⁰ Тэдэ хаануудай табаниинь хосоронхой, нэгэниинь бии, нүгөөдэхинь үшөө ерээдүй, ерэхэдээшье удаан байхагүй юм. ¹¹ Бии байһанаа, үгы болоһон арьяатан наймадахи хааниинь болоно; энэнь түрүүшын долоон хаануудай нэгэниинь тиин хосорон халаха тээшээ боложо байна. ¹² Шинии хараһан арбан эбэрнүүд хадаа хаан түрые үшөөл абаагүй арбан хаанууд гээшэ, теэд тэдэнэр арьяатантай хамта нэгэ сагай турша соо хаанай засаг түрэ абаад байха. ¹³ Тэдэнэр хаба шадалаа, засаг түрээ арьяатанда үгэхэ гэхэн гансал зорилготой. ¹⁴ Тэдэ хаанууд Үргэлэй Хурьганай урдаһаа дайралдаха, тиин Үргэлэй Хурьган тэрэнэй урижа асарагшадтай, тэрэнэй шэлэжэ абагшадтай, тэрэндэ үнэн шударгы байгшадтай хамта тэмсэжэ тэдэниие диилэхэ. Юуб гэбэл, Үргэлэй Хурьган эзэдүүдэй Дээдын Эзэн, хаануудай Хаан мүн». ¹⁵ Эльгээмэл намда иигэжэ хэлээ: «Янхан эмын һуугша гол мүрэнүүд хадаа элдэб янзын арадууд, улад зон, үндэһэ яһатан, янза бүриин хэлэтэй зон гээшэ. ¹⁶ Шинии хараһан эдэ арбан эбэрнүүд, мүн арьяатан тэрэ Янхан эмые үзэн ядажа зэбүүрхэхэ, тэрэниие үгырүүлэн хоһоруулха, салдаган нюсэгөөр үлөөхэ, тэрэ эмые эдижэрхихэ, тиигээд галда шатааха байна. ¹⁷ Юундэб гэбэл, Бурхан номнол үгэнүүдыень бээлүүлэгдэтэр табихан зорилгыень бээлүүлхэ хүсэл арбан хаануудай зүрхэ сэдхэлдэ хадуун оруулаа.

Бурханай хүсэл иимэ: тэдэ хаанууд хоорондоо зүбшөөд, хаанай засаг түрые арьяатанда үгэхэ. ¹⁸ Шинии хараһан эхэнэр болбол газар дэлхэйн хаануудые зонхилогшо агуухэ ниислэл мүн гээшэ».

Вавилоние хэһээлгэ

18 ¹Тэрэнэй удаа иимэ юумэ харабаб: аргагүй ехэ эрхэ засагтай ондоо нэгэ эльгээмэл тэнгэриһээ буужа байба, тиин газар дайда тэрэнэй алдар солоор гэрэлтэн толоршобо. ²Тэрэ эльгээмэл бардаастай шангаар иигэжэ хашхарба: Агуу ниислэл Вавилон халаа, халаа! Энэ ниислэл ада шүдхэрнүүдэй шэбээлдэг газар, элдэб эсын боохолдойнуудай обооролдодог үүр, элдэб эсын бузар шубуудай суглардаг үүр, элдэб эсын бузар булай, жэрхэштэй муухай арьяатадай шэбээлдэг газар болошоо. ³Юундэб гэхэдэ, ниислэл Вавилон забхайралайнгаа бузар архяар бүхы арадуудые һогтоогоо, тиин газар дэлхэйн хаашуул тэрээнтэй холбоорилдоо, наймаашад хонжоошодшые үлүүсэ һайн байдалдань дашууран орожо, хэтэртэрээ баяжаа. ⁴Тэнгэриһээ иигэжэ хэлэһэн ондоо абяан намда дулдаа: Энэ ниислэлэй нүгэл шэбэлынь таанарта нүлөөлхэгүйн тула, гай аюулынь таанарые дайрахагүйн тула, арад зомни тэрэ хотые орхиит. ⁵Юундэб гэбэл, тэрэнэй нүгэл шэбэлынь огторгой тэнгэридэ туласараа обооршоод байна, тиин тэрэ ниислэлэй хэһэн гэмтэ ябадалые Бурхан ханаандаа оруулба. ⁶Тэрэ ниислэлые хэһэн үйлэйн хэмжээгээр хэһээгты, хэһэн үйлэ хэрэгүүдэйн түлөө хоёр дахин хатуугаар хэһээгты, хоёр дахин хатуу архи тэрэнэй аяга руу хэгты! ⁷Өөрыгөө тэрэ хэды ехээр магтуулаа гээшэб, хэды ехэ баялиг соо умбаа гээшэб, тэды ехэ ядарал зоболон, уйдхар гашуудал тэрээндэ асаратгы! Юундэб гэбэл, тэрэ ниислэл иигэжэ досоогоо ханаа: «Би хатан шэнги һайн һуунаб, би бэлбэһэн эхэнэр бэшэб, уйдхар гашуудалые үзэхэгүйб!» ⁸Тиимэһээ али бүхы гай аюулнууд: үхэл хосорол, гай гашуудал, үлэхэлэн зоболон тэрэ эмэдэ гэнтэ буужа ерэхэ даа! Тэрэниие галда шатааха, ушарынь гэбэл, тэрэниие шүүбэрилхэ Эзэн Бурхан угаа хүсэтэй юм. ⁹Тэрэ ниислэлэй шатахада гараһан гал түймэрэй утаа уняар харахадаа, зальхайралга, баялиг соогуур дураараа хүльбэрэлдэжэ ябаһан газар дайдын хаашуул тэрэ ниислэлые шаналжа уйлаха гашуудаха байна. ¹⁰Тиин хаашуул холо зогсон тэрээниие хараад, ядарал зоболонһоонь үхэтэрөө айжа, иигэжэ хэлэхэ юм: Аргагүй хүсэтэй, агуу ниислэл Вавилон, аймшагтай ехэ гашуудал зоболон шамда тудаб – зарга шүүбэридэ шаамайе үгэжэ

хэхээхэ саг гэб гэнтэ ерэбэ! ¹¹ Наймаашад хонжоошодшые тэрэ хотые шаналан уйлана, гашуудан зобоно, ушарынь гэбэл, тэдэнэй эд бараае хэншые худалдажа абахагүй. ¹² Тэдэнэй обоо собоо алта, мүнгые, үнэтэ шулуунуудые,hubадhubные, нарин улһые, шад улаан бүдөөр, дардам торгоор, үнэтэй улаабтар бүдөөр оёһон хубсаһыень, хоншуухан үнэртэй модонуудые, заанай яһаар хэһэн бүтээлнүүдые, үнэтэ модоор, гуули, түмэрөөр, гантиг шулуугаар хэһэн амһартануудыень ондоо хэншые саашадаа абахагүйл. ¹³ Эдее амтатай болгодог зүйлнүүдыень, хайхан үнэртэй ургамалай шүүһыень, хүжэ санзайень, либанон гэдэг уталгыень, архи дарһыень, оливай тоһыень, хурабшаадхан сагаан гурилыень, шэниисэ таряаень, үхэр, хони, моринуудыень, ута тэргэнүүдыень, барлагуудыень, сэрэгэй плэндэ абтаһан хүнүүдыень ондоо хэншые саашадаа абахагүйл. ¹⁴ Шинии сэдхэн шунажа байдаг юумэнүүдшни үгы болошобо, шинии бүхы алдар соло, үнэтэ баялигшни хосорон халаа. Ондоо тэдэшни хээээш бусажа ерэхгүй! ¹⁵ Эдэ бүхы эд бараануудые худалдажа, тэһэ баяжаһан наймаашад тэрэ ниислэлые холоһоо хараад, ядарал зоболонһоонь үхэтэрөө айһандаа, уйлан, гэгэн, ¹⁶ иигэжэ хэлэхэ юм: Нарин гэгшын улһаар, алта мүнгөөр, үнгэтэ шулуу,hubадаар толоржо байһан үнэтэй сэнтэй улаан бүд хубсаһа үмдэһэн агуу ниислэл, шамда гашуудал зоболон тудабал! ¹⁷ Тиимэ ехэ баялиг зөөри гэб гэнтэ халашабал! Тиин бүхы капитанууд, уһан далайгаар тамарагшад, морягууд, далайн албанда ябажа, амидарагша бүхы хүнүүд холо зогсоод, ¹⁸ ниислэл хотын шатаха дүрэхэдэ гараһан утаа уняарые харахадаа, орилон шашхан, иигэжэ хэлэхэ: «Агуу ниислэлтэй жэшэмээр хото байха гү? ¹⁹ Тиин тэдэ зон тархи дээрээ үнэһэ адхан, уйлалдан гэгэлдэн иигэжэ хашхаралдаха: Агуу ниислэл, шамда айхабтар ехэ гашуудал зоболон тудабал! Далайда онгосотой байһан хүнүүд ниислэл хотын баялигаар тэһэ баяжаа. Харин тэрэ хото гэб гэнтэ хоһон сүл губи болошоо! ²⁰ Огторгой тэнгэри, Бурханай хүнүүд, элшэд, лүндэншэд, энээндэ хүхин баясыт! Таанарай түлөө тэрэ ниислэлые Бурхан хэһээгээл! ²¹ Удаань баатар ехэ хүсэтэй эльгээмэл тээрмын шулуунай зэргын томо гэгшын шулуу үргэжэ, далай руу шэдэхэ зуураа, иигэжэ үгүүлбэ: Агуу ниислэл Вавилониие иимэл хүсэтэйгөөр холо шэдэжэ хаяхань! Энэ ниислэл саашадаа оршохоёо болёо! ²² Хүгжэмэй дуугархань дахин дуулдахагүй, ятага, жэмбүүршэдэйшые, бүрээ дуугаргагшадайшые хүгжэм дуун дахин дуулдахагүй. Гар дархашуулшые, урлалгын ажалшые саашадаа эндэ хэхэгүй. Тээрмын

шулуунай эрьелдэн түерхые ондоо хэншые дуулахагүй. ²³ Дэнгэй гэрэлые хотодо ондоо хэншые харахагүй. Гэрлэхээ байгаа хүбүүн басаган хоёрой хөөрэлдэжэ зугаалхые ондоо хэншые дуулахагүй. Юундэб гэбэл, шинии наймаашад газар дэлхэйн амбан найдууд байгаа, шинии үйлэдэн хэдэг байһан эльбэ жадханууд али бүхы арад зониие мэхэлээ. ²⁴ Бурханай хүнүүдэй, лүндэншэдэй, газар дэлхэйдэ амидаржа ябахандаа алуулһан зоной шуһа адхарһанда энэ хото зэмэтэй!

Тэнгэри дээрэхи баяр

19 ¹Тэрэнэй удаа аргагүй олоороо хүнүүдэй суглараад, дүүлдэн шууялдан байһан шэнгээр иигэжэ хашхаралдаха абьяан намда тэнгэри дээрэһээ дулдаба: Бурханда магтаал соло! Манай Бурханда абарал, алдар соло, хүсэ шадал байна! ²Ушарынь хэлэбэл, тэрэнэй шийдхэбэринүүд үнэн зүб юм: бүхы газар дэлхэйнхидые зальхайруулһанайнь түлөө аргагүй забхай Янхан эмые Бурхан шүүбэрилэн гэмнээ: зарасанарайнь шуһа адхаруулһанайнь түлөө Янхан эмые Бурхан хэһээгээ! ³Тиин тэдэ дахин ооглон хашхаралдаа: Бурханда магтаал соло! Янхан эмые шатаахада гараһан утаан хэтын хэтэдэ дэгдэжэ байна! ⁴Хорин дүрбэн ахаматууд, дүрбэн амитад ерэжэ, хаан шэрээдээ һууһан Бурханай урда һунан унаад, хүгэдэн мүргэхэ зуураа: Болтогой! Бурханда магтаал соло! — гэжэ хэлэбэд.

Үргэлэй Хурьганай түрэ найр

⁵Хаан шэрээгэй зүгһөө иигэжэ хэлэхэ абьяан дулдаба: Бурханай бүхы зарасанар, Бурхание хүндэлдэг бүхы хүнүүд, юрыншые хүнүүд, засаг барыдагыше хүнүүд, манай Бурхание магтан найшаагыт! ⁶Аргагүй олоороо хүнүүдэй суглараад дүүлдэжэ байһан шэнги гү, али уһан хүүюурэй шууяжа, шангаар тэнгэри дуугаржа байһан шэнги иимэ абьяан намда дулдаба: Бурханда магтаал соло! Хамагые зонхилогшо Бурхамнай, Дээдын Эзэн засаг түрөө абаба! ⁷Бидэ баярлахабди, хүхихэбди, тэрэниие магтан, алдар сууень дуудахабди, ушарынь хадаа Үргэлэй Хурьганай түрэ болохонь! Хадамда ошохо басаганиинь бэлэн болоод, тэрэнээ хүлээжэ байна: ⁸Басагандань нарин улһаар оёһон ялагар, сэбэр хубсаһан үгтэнхэй. Нарин улһан гээшэнь Бурханай арад зоной үнэн зүб үйлэ хэрэг гэһэн удхатай. ⁹Удаань намда Бурханай Эльгээмэл иигэжэ хэлэбэ: «Буулгажа бэшээд аба! Үргэлэй Хурьганай түрэ найрта урилга абагшад жаргалтай! Энэ Бурханай хэлэһэн ёһотойл үнэн зүб үгэнүүд гээшэ!»

¹⁰ Би газарта хүнэн хэбтэжэ, хүлдэнь мүргөөб. Теэд тэрэ намда хэлбэ: «Иимэ юумэ бү хээрэй, мэдэжэ бай! Би Иисус тухай гэршэлдэг шамтайл адли, шиний аха дүүнэртэл адли зарасань гээшэб! Бурханда хүгэдэн мүргэ! Иисус тухай гэршэлэгшэд лүндэншэдые урмашуулдаг хүлдэтэй юм».

Сагаан мори унаһан хүн

¹¹ Тиин сэлээтэй байһан тэнгэри харабаб – тэндэ сагаан морин байба, тэрэниие хүн унаад һууба. Мори унаашань Үнэн зүб, Сэхэ шударгы гэжэ нэрэтэй юм. Тэрэ һуугаашань зарга шүүбэриие, дайн сэрэгые үнэн зүбөөр хэгшэ юм. ¹² Тэрэнэй нюдэнүүдын гал дүлэн шэнги ялалзана, толгой дээрэнь олон тоото титимүүд байна. Бэе дээрэнь нэрэнь бэшээтэй, тэрэниенё өөрһөөнь бэшэ хэншые мэдэнэгүй. ¹³ Шуһан соо шиихажа норгоһон суба нэмэрэнхэй; тэрэнэй нэрэнь – Бурханай Үгэ юм. ¹⁴ Тэнгэри дээрэхи сэрэгшэд сагаан моринуудые унаад, нарин сагаан улһаар оёһон сэбэрхэн хубсаһа үмдөөд, хойноһоонь дахажа ябанад. ¹⁵ Арадуудые илан дарахын тула амандаа хурса һэлмэтэй; тэрэнь бүхы арадуудые түмэр таягаараа ударидан зонхилжо байха. Тэрэ Хамагые зонхилогшо Бурханай ехэ уур сухалай томо тогоон соо үзэмэй жэмэсые низа тэһэ дэбһэнэ. ¹⁶ Тэрэнэй суба дээрэ, гуя дээрэ иигэжэ бэшээтэй: хаашуулай Хаан, эзэдүүдэй Дээдын Эзэн. ¹⁷ Нара дээрэ зогсожо байһан эльгээмэлые би харааб. Огторгой доохонуур ниидэжэ ябаһан бүхы шубуудта хандан, тэрэ эльгээмэл иигэжэ шангаар хашхаржа байба: «Бурханай ехэ эдэе хоол барихаяа эндэ сугларагты! ¹⁸ Хаашуулай, сэрэгэй дарганарай, хүсэ ехэтэ хүнүүдэй мяха, моринуудай, тэдэниие унаад ябагшадай мяха, сүлөө ажалтанай, барлаг богоолнуудай мяха, багашуул, ехэшүүлэй мяха эдихэт». ¹⁹ Сагаан мори унаад ябагшын, тэрэнэй сэрэгшэдэй урдаһаа тэмсэн дайралдахаяа арьяатанай, газар дэлхэйн хаашуулай, тэдэнэй сэрэгүүдэй суглараад байхые би харааб. ²⁰ Арьяатаниие шүүрэн бариба, тэрээнэй урда элдэб дүлгэ тэмдэг харуулжа, арьяатанай тамга табяад, тэрэнэй хүрэг дүрсэдэ хүгэдэн мүргүүлжэ байһан хуурмаг лүндэншые арьяатантай хамта шүүрэн бариба. Тэдэ хоёрые хоюулыенё дүрэжэ байһан хүхэртэй нуур худар амидыгаар шэдэбэ. ²¹ Бэшэниинё сагаан мори унаад ябагшын аман соохи һэлмээр сабшуулжа алуулһан байна. Тэдэнэй мяхые бүхы шубуу шонхорнууд эдижэ садаба.

Мянган жэл

20 ¹Тэнгэриhээ буужа ябаһан эльгээмэлые харабаб. Оёоргүй гүнзэгы нүхэнэй түлхюур тэрээндэ байгаа. Гартаа аргагүй томо гэнжэ баринхай. ²Ехэ үнинэй могой, шолмос, сатана байһан лууе Бурханай Эльгээмэл барижа ерээд, мянган жэлдэ мултархагүй бүхөөр гэнжэлэн хүлижэрхибэ. ³Тэрэ лууе Бурханай Эльгээмэл оёоргүй гүнзэгы нүхэ руу шэдэжэ хаагаад, нүхыень тамгалжархиба. Мянган жэлэй дууһатар тэрэ луу арадуудые саашадаа мэхэлхэ аргагүй болоһон байна. Тэрэ болзоройнь үнгэрхэдэ, луу ойро зуурахаана сүлөөлэгдэхэ юм. ⁴Зарга шүүбэри хэхэ эрхэтэй хүнүүдэй һууһан хаан шэрээнүүдые харабаб, мүн Иисус тухай, Бурханай Үгэ тухай гэршэлһэнэйнгээ түлөө толгойгоо таһа сабшуулаашадай хүнэһэнүүдые, арьяатанда, тэрэнэй хүрэг дүрсэдэ хүгэдэн мүргөөгүйшүүлэй, духадаа гү, али гартаа тэрэ арьяатанай тамга табюулаагүйшүүлэй хүнэһэнүүдые би харабаб. Тэдэнэр дахин амидыруулагдажа, мянган жэл соо Иисустай хамта засаг түрэ барижа байгаа. ⁵Бусад үхөөшэдынь мянган жэлэй үнгэртэр һөөргөө амидыруулагдаагүй хэн. Энэ анха түрүүшын амидыралга мүн байгаа. ⁶Түрүүшын амидыруулгын үедэ дахин амидырагдаха хүнүүд жаргалтай. Тэдэнэр Бурханай хүнүүд мүн. Тэдэнэр хоёрдохийё үхэхгүй юм. Тэдэнэр Бурханай, Христосой санаартадынь болохо, мянган жэлэй туршада Иисустай хамта засаг түрэ барижа байха. ⁷Мянган жэлэй үнгэрхэдэ сатана түрмэһөө табигдаха байна. ⁸Тиигээд сатана арадуудые мэхэлхээ ошохо, дайн сэрэг үүдхэын тула дэлхэйн бүхы дүрбэн зүгүүдээр ябаха, гога, магого гэжэ арадуудта ошохо. Далайн эрьсын элһэ хайр мэтэ үй түмэн хүнүүдые сатана гулидхан суглуулха байна. ⁹Тэдэнэр бүхы газар дайдые алхалан гаража, Бурханай зоной байрлаһан газарые, тэрэ зоной эгээн дуратай хотые хүрээлхэ. Теэд тэрэ үедэнь тэнгэри дээрэһээ гал буужа ерээд, бултыень шатаажархиха юм. ¹⁰Тэдэ зониие мэхэлэгшэ Шолмос дүрэжэ байһан дүүрэн хүхэртэй нуур худар хаюулаа хэн. Түрүүн тэрэ нуур руу арьяатан, хуурмаг лүндэншэ хоёр шэдүүлһэн байна. Тэдэниие хэтын хэтэдэ, үдэр хүнигүй тэндэ зобоожо туляжа байха юм.

Һүүлшын зарга шүүбэри

¹¹Тиигээд би сагаан үнгэтэй асари томо хаан шэрээе, тэрэ шэрээ дээрэ Һуугшые харабаб. Шэрээдэ Һуугшын байһан ушарһаа газар тэнгэри хоёр тэрьелэн далда орошобо: тэрэ хоёрой Һууха Һуури

байгаагүй. ¹² Үхөөшэдые, багашуулые, ехэшүүлые хаан шэрээгэй урда зогсожо байхыень би харабаб. Номууд нээлгээтэй байба. Удаань баһа нэгэ ном – ажамидаралгын ном дэлгэгдэбэ. Үхөөшэд тэдэнэй өөһэдынь үйлэ хэрэгэй ёһоор, мүн номуудта бэшээтэй байһан ёһоор шиидхүүлээ бэлэй. ¹³ Бии байһан үхөөшэдөө далай үгөө, бии байһан үхөөшэдөө үхэл, үхэлэй орон хоёр үгөө, тиин үхөөшэн бүхэниие тэрэнэй хэнэн үйлэ хэрэгэйнь хэмжээгээр шиидхээ. ¹⁴ Удаань үхэл, үхэлэй орон хоёрые гал дүлэтэ нуур руу хаяһан байна. Энэнь хоёрдохи үхэл – гал дүлэтэ нуур мүн байһан юм. ¹⁵ Амидаралгын ном соо бэшэгдээгүйшүүлые гал дүлэтэ нуур худар шэдээ һэн.

Шэнэ тэнгэри, шэнэ газар

21 ¹Тиигээд би шэнэ тэнгэри, шэнэ газар хоёрые харабаб. Түрүүшын тэнгэри, түрүүшын газар хоёр хэтэ заяанда үгы болоо, далайшые хосороо бшуу. ² Нангин Хотые – шэнэ Иерусалимые би харааб. Хадамда гарахаяа нүхэр хүбүүгээ хүлээжэ байһан шэнэ Иерусалим гоёнхой юумэ тэнгэриһээ, Бурханһаа буужа ябаба. ³ Хаан шэрээгэй тэндэһээ шангаар иигэжэ хэлэхые дуулабаб: «Харалши, энэ Бурханай майхан гээшэ. Хүнүүдынь тэрэ майханда байна, Бурхан хододоо тэдэнтэй байха! Тэдэ хүнүүд тэрэнэй арад зонийнь болохо, Бурхан өөрөөшынь тэдэ хүнүүдтэй хамта ажаһууха, тэдэнэй Бурханийнь болохо. ⁴ Бурхан тэдэ хүнүүдэй нюдэнһөө гараһан дуһал нулимса бүхэниие аршаха. Үхэлгэ хосоролгошынь саашадаа байхагүй, уйдхар гашуудал, орилолдоон бархиралдаан, үбдэлгэ хабдалгашынь саашадаа байхагүй, ушарынь гэбэл, урданай бүхы юумэн урдажа ошоо». ⁵ Хаан шэрээдэ Һуугша иигэжэ хэлээ: «Харалши, би баран шэнэ юумэ хэнэб!» Тиигээд тэрэ иигэжэ хэлэбэ: «Буулгажа бэшээд аба, эдэ үгэнүүдтэ этигэхэдэ болохо, юундэб гэбэл, эдэ бүхы үгэнүүд үнэн зүб юм». ⁶ Намда тэрэ хэлэбэ:

– Бүтэбэ! Би Альфа, Омега гээшэб, Түрүүшынхинь, Һүүлшынхинь гээшэб. Ундаа хүрэнэн хүндэ амидаралгын булагай уһанһаа миинтэ уулгахаб. ⁷ Илагша бүхы эдэ юумэнүүдые намһаа абаха. Би тэрэнэй Бурханийнь болохоб, тэрэ минии хүбүүмни болохо. ⁸ Аймхай дүүлэгэрнүүд, Иисуста хүзэглэдэггүй хүнүүд, бузар муухай нүгэл хэгшэд, алууршад дээрмэшэд, зальхай ябадалтан, эльбэ хэгшэд, онгондо шүтэгшэд, элдэб худалшад гал, хүхэрөөр дүлэтэн носогшо нуур руу хаюулха. Энэнь хоёрдохи үхэлгэ мүн.

⁹ Удаань гай аюулай һүүлшын долоон дүүрэн аягатай долоон эльгээмэлэй нэгэниинь ерэжэ, намтай хөөрэлдэбэ: «Харалши даа, би шамда бэриее – Үргэлэй Хурьганай һамгые үзүүлхэб!» – гэбэ. ¹⁰ Тиин Нангин Һүлдөөр намайе аргагүй үндэр хада дээрэ абаашаад, тэнгэри дээрэхэ Бурханһаа доошоо буужа ябаһан Арюун нангин Иерусалим хотые намда харуулба. ¹¹ Тэрэ хотонь Бурханай алдар солоор толорон гэрэлтэжэ байба. Тэрэ гэрэл туяань болор мэтын сэбэр тунгалаг хас шулуун шэнги үнэтэй шухаг шулуунуудтал адляар ялалзажа байгаа бэлэй. ¹² Иерусалим хотые тойроод арбан хоёр хаалгатай үндэр гэгшын хананууд байба. Хаалгануудайн хажууда – арбан хоёр эльгээмэлнүүд, хаалганууд дээрэнь Израилиин арбан хоёр угсаатанай нэрэнүүд бэшээтэй. ¹³ Гурбан хаалгань зүүн тээшээ, гурбаниинь – хойшоо, гурбаниинь – урагшаа, гурбаниинь – баруун тээшээ харанхай. ¹⁴ Хотын хана арбан хоёр шулуутай һуури дээрэ табяатай, тэдэнэй дээгүүр Бурханай Хурьганай арбан хоёр элшэдэй нэрэнүүд бэшээтэй. ¹⁵ Намтай хөөрэлдэһэн эльгээмэл хотые, тэрэнэй хаалгануудые, ханануудые хэмжэхын тула алтан таяг баряад ябаа. ¹⁶ Тэрэ хото болбол ута үргэнөөрөө адли, тэбхэрхэн хэмжээнэй байгаа һэн. Эльгээмэлэй өөрынгөө таягаар хото хэмжэхэдэнь, утаашаа хоёр мянга дүрбэн зуун модо байба, үргэниинь, үндэрынь утатайгаа адли байба. ¹⁷ Эльгээмэлэй хотын хана хэмжэхэдэнь, үндэрынь жаран зургаан метр байба. Эльгээмэл хүнэй хэмжэдэг хэмжүүрые хэрэглээ һэн. ¹⁸ Ханань хас шулуугаар, харин хотонь нэбтэ харагдадаг шэл шэнги сэбэр алтаар баригданхай байгаа. ¹⁹ Хотын ханын һууринуудын элдэб янзын эрдэни шулуунуудаар хэгдэһэн: нэгэ һууринь хас шулуугаар, хоёрдохинь һууринь – миндарга шулуугаар, гурбадахинь – халтар манаар, дүрбэдэхинь – номин шулуугаар хэгдэһэн байба. ²⁰ Табадахи һууринь – сардониксаар, зургаадахинь – мана шулуугаар, долоодохинь – хризосолидаар, наймадахинь – бериллээр, юһэдэхинь – бэгтэ болор шулуугаар, арбадахинь – хризопразаар, арбан нэгэдэхинь – оюун шулуугаар, арбан хоёрдохинь – аметистээр хэгдэһэн байба. ²¹ Арбан хоёр хаалгануудын арбан хоёр һубадаар, хаалга болгониинь үргэлжэ хүжэ һубадаар хэгдээтэй. Хотын гол гудамжань шэл шэнги нэбтэ харагдажа байдаг сула алтаар хэгдэнхэй. ²² Хото соо Һүмэ би хараагүйб. Тэрэнэй Һүмэнь – Хамагые зонхилогшо Эзэн Бурхан өөрөө, мүн Үргэлэй Хурьган ха юм. ²³ Хотын һаруул гэрэлтэй байхын тула нара, һарашье хэрэггүй байгаа, юундэб гэбэл, Бурханай

алдар солонь хотые гэрэлтүүлээ ха юм. Хурьган тэрэнэй дэнгын мүн. ²⁴ Арадууд тэрэ хотын гэрэл туяа соо ябаха, газар дэлхэйн хаашуул өөһэдынгөө баялиг зөөриие тэрээндэ асаржа үгэхэ. ²⁵ Хотын хаалганууд бүхэли үдэртөө суургалагдангүй, нээлгэтэй байха, ушарынь гэбэл, тэндэ хүни болохогүй бшуу. ²⁶ Арадуудай нэрэ солье, баялиг зөөриие тэрэ хотодо асарха. ²⁷ Бузарлагдаһан ямаршые юумэн тэрэ хотодо орохогүй, гутамшаг муухай юумэ хэгшэд, мэхэ гохо гаргагшад тэрэ хотодо орохогүй. Үргэлэй Хурьганай амидаралгын ном дэбтэртэ нэрээ бэшүүлһэн хүнүүд лэ тиишэ оруулагдаха.

Амидаралгын гол мүрэн

22 ¹ Болор мэтэ ялалзаһан амидаралгын уһанай гол мүрэниие удаань намда эльгээмэл харуулаа. Тэрэ гол мүрэн Бурханай болон Үргэлэй Хурьганай хаан шэрээгэй дорohoо урдан гарадаг. ² Тиигээд эгээн ехэ гудамжны дундуур урдагша юм. Мүрэнэй хоёр эрьеэрнь амидаралгын модон ургадаг, тэрэ модон нара бүри ургаса үгэхэ зуураа, жэлдээ арбан хоёр дахин үрэ жэмэс асардаг, тэрэ модоной набшаһануудын арадуудые аргалжа эдэгээхэдэ тухалдаг. ³ Бурханай хараалда хүрэмөөр муу юумэн тэндэ хэзээдэшые болохогүй. Бурханай ба Үргэлэй Хурьганай хаан шэрээ тэрэ хотодо байха. Бурханай зарасанар тэрээндэ алба хэхэ байна. ⁴ Зарасанарын тэрэнэй нюурые хараха, тэрэнэй нэрэнь тэдэнэй магнайда байха. ⁵ Тэндэнь дахин хүни болохогүй, тэдэндэ дэнгэйшые гэрэл, наранайшые туяа ондоо хэрэггүй, юуб гэбэл, тэдэниие Эзэн Бурхан гэрэлтүүлхэ байна. Тиин тэдэнэр хэтын хэтэдэ хаан түрэ засаг барижа байха юм.

Иисусай ерэхэ тухай

⁶ Бурханай Эльгээмэл намда иигэжэ хэлээ: «Эдэ үгэнүүдтэ этигэхэдэ болохо, юундэб гэбэл, эдэ үгэнүүд үнэн зүб юм. Лүндэншэдтэ өөрынгөө хүлдые үгэгшэ Эзэн Бурхан нааяр ямар юумэнэй болохые өөрынгөө зарасанарта харуулхын тула эльгээмэлээ ябуулһан байна. ⁷ Иигээд лэ би нааяр ерэхэб! Энэ номой уридшалан хэлэһые сахин бээлүүлэгшэ жаргалтай!» ⁸ Би, Иоанн энээниие дуулааб, харааб. Энэниие дуулаад, хараад байхадаа, эдэ бүгэдые намда харуулһан эльгээмэлэй хүлдэнь унажа, хүгэдэн мүргөөб. ⁹ Тээд эльгээмэл намда иигэжэ хэлээ: «Боли даа, иимэ юумэ бү хэ! Би шам шэнгил, шинии лүндэншэд — аха дүүнэр шэнгил, энэ номой үгэнүүдые сахин бээлүүлэгшэдтэйл адли зараса гээшэб. Ши Бурханда хүгэдэн

мүргэ!»¹⁰ Намда тэрэ иигэжэ хэлээ: «Энэ номой уридшалан хэлэ-
хэн үгэнүүдые бү суургалан тамгалаарай! Саг бүри дүтэлөөд байна.
¹¹ Муу хүн муу юумээ хэжэ үргэлжэлүүлэг! Жэрхэмшэг муухай хүн
тэрэл муухай юумээ хэг, хайн хүн хайе хэжэл байг, арюун нангин
хүн тэрэл зандаа арюун ябаг». ¹² «Иигээд Би хаядаа ерэхэб! Хүн
болгониие хэһэн хэрэгэйнэ зэргээр шагнаха, хэһээхын тула шагна-
лаа, хэһээлтээ өөртөө абажа ябанаб. ¹³ Би Альфа, Омега гээшэб,
Түрүүшынхинь, Һүүлшынхинь, Эхиниинь, Эсэсын гээшэб». ¹⁴ Хуб-
саһаа сэбэрлэгшэд жаргалтай! Тэдэнэр амидаралгын модондо хүр-
тэлсэхэ эрхэтэй, тэдэнэр хаалгын үүдээр хотодо орохо эрхэтэй.
¹⁵ Теэд нохосууд, эди шэдитэн, зальхай забхай ябадалтан, алуурша
этэгээдүүд, онгонуудта шүтэгшэд, худал хуурмаг ябадалда дура-
тайшуул, тиимэ юумэ хэгшэд – хотын гадаа тээ үлэхэ юм. ¹⁶ Иимэ
гэршэлгы таанадта һүзэглэгшэдэй бүлгэмүүдэй дамжуулхын тула
өөрынгөө эльгээмэлые би, Иисус, ябуулһан байнаб. Би Давидай
Үндэһэ, Һалааниинь гээшэб. Би үүрэй ялагар одон гээшэб». ¹⁷ Нан-
гин Һүлдэшые, хадамай басаганшые: «Ерэ!»— гэнэд. Шагнажа бай-
гаашашые: «Ерэ!»— гэг. Ундаа ехээр хүрэгшэдшые ерэг! Амидаралгын
уһа абаха дуратайшуул ерэжэ, тэрэ уһа миинтэ абаг лэ!

Түгэсхэл

¹⁸ Энэ номой уридшалан хэлэһэн үгэнүүдые шагнагша бүхэндэ
иигэжэ дуулганаб: эдэ үгэнүүдтэ ямар нэгэн юумэ хэн нэмэлтэ
оруулнаб, энэ ном соо бэшээтэй гай аюулые Бурхан нэмэжэ, бүри
ехэ болгохо. ¹⁹ Энэ номой уридшалан хэлэгдэһэн үгэнүүд сооһоо
ямар нэгэн юумэ хаһажа хаяа болболынь, тэрэнэй амидаралай мо-
доной үрэ жэмэс эдихэ эрхые, Нангин Хотодо орохо эрхые Бурхан
хаһаха юм. Энэ модон ба энэ хото тухай энэ ном соо бэшээтэй.
²⁰ Энэниие гэршэлэн баталагша иигэжэ хэлэнэ: «Тиимэ даа, би
хаядаа ерэхэб!» Болтогой, Дээдын Эзэн Иисус, заларжа ерэ! ²¹ Дээ-
дын Эзэн Иисусай үршөөл хайрань булганда хүртэхэ байна!